

O LE FAILAUGA
O LE 'UPU MONI SILI

Tusia e

Tini Inu Lam Yuen

O LE FAILAUGA O LE UPU MONI

TINI INU LAM YUEN

TRANS-PACIFIC PUBLISHERS
Suva, Fiji

Copyright by Samoa Mission
of Seventh-day Adventists

Reprinted with permission



Faia'oga o le Vasega mo Failauga Nofo Aiga, Misiona
Samoa o le Ekalesia Aso Fitu o le Toe Afio Mai.

Tini Inu Lam Yuen — 1942 – 1979

O ALOFA'AGA FA'AKERISIANO MOLIA

I Ë UMA LAVA O LO'O 'AUAUMEA FA'ATASI MA A'U i le galuega tele o le momoli ina lea o le fe'au mulimuli o le alofa tunoa o le Atua i lenei lalolagi. O i latou ia ua latou mautinoa o itū e fiafia ai, ma itū e tigā ai i totonu o lenei galuega faigatā. O i latou ia ua tu'uina atu o latou soifua fa'atasi ma a'u ma le lē taofia o se mea, ina ia vave fa'aumaina Lana fe'au, a e afio mai Iesu Keriso i Lona mamalu.

O NAI UPU E UIGA I LENEI TUSI

I le amataga o le tausaga e 1942, sa fa'atonuina ai a'u e le pulega o matā'upu tau A'oga a le Ekalesia Aso Fitu i Samoa ina ia 'ou ta'ita'iina le vasega mo i latou ua tataua ona aofia ai i le galuega o le folafolaina o le Afioga a le Atua. Sa ta'ita'i le ali'i faife'au o Pastor J.T. Howse i le Misiona a Samoa i ia ōna pō. O le tusi sa fa'aaogāina, o le **"Ideal Ministry"** (pe a fa'a-Samoaina, **"O le Galuega Sili i le Faiva o le 'Au'auna atu"**). E to'a ono i latou sa aofia ai i lea vasega.

Ina ua fa'ateleina pea le galuega a le Atua i Samoa, ma ua vala'auina ai loa a'u ma le aiga mo le amataina o le galuega i Amerika Samoa. Sa tu'ua loa lea galuega o le faia'oga, a ua feagai loa ma le tala'iga o le tala lelei atoa ma le atiina'e o 'au lotu. Ona o le fia a'oa'oina o le 'au faigaluega nofo 'aiga, e fesoasoani atu i le 'au faigaluega tofia, sa fa'aāuau ai loa lava lea vasega mo i latou sa ulufale mai i le ekalesia.

Sa fa'amautūina lea fuafuāga e le Komiti Tumau a le Misiona Samoa, ma ua fa'apea ai loa lava ona tu'u fa'atasi lenei vasega i lalo ifo o le pulega a le ta'ita'i o galuega a le 'Au Matutua, po o le 'Au Faigaluega nofo aiga. Sa fa'aopoopo loa o isi manatu i le ulua'i tusiga o matā'upu sa feagai ai ma le vasega muamua, mai ia Tusi e igoa o le **"Training Light Bearers,"** ma le **"The Art of Preaching,"** atoa ma isi 'upu mai le Agaga o Valo'aga. A e sa tu'u 'ese fo'i nisi matā'upu mai ulua'i matā'upu ina ia tala feagai lelei ma le tulaga mana'omia.

E ui ina tele pea galuega e feagai ai ma tofiga ese'ese o le galuega a le Atua i Samoa, a e tu'uina atu pea lava le agaga au'auna i lea lava matā'upu, o le faia lea o vasega mo failauga nofo aiga. Ma o le to'atele lava o le 'au faigaluega fa'apea ma le 'au faigaluega nofo aiga, sa maua mai lo latou āgava'a i le faiva o le folafola i totonu o ia vasega. E 'ese ai i latou o ē sa ūlufale atu i kolisi ma iunivesetē i atunu'u mamao.

Mai le 1942-1979 o lo'o alu pea lava lea vasega, ma sa maua pea lava le avanoa lelei 'ou te malaga ai i 'au lotu uma lava i Salāfai, Upolu, ma Amerika Samoa mo ia a'oa'oga. E fa'apenā fo'i i nu'u i fafo atu o Samoa e fa'aaogāina ai le gagana Samoa ona fai ai o ia vasega. E i ai 'au lotu i Aukilani, Ueligitone i Niu Sila; ma Honolulu, Los Angeles, San Francisco, ma Seattle i Amerika.

Ona ia fa'atumauiina pea lava lea agaga lelei i totonu o le galuega a le Atua i Samoa, ua saunia ai lenei tusi e fesoasoani atili ai pea i ē ua uma ona i ai ia a'oa'oga. E fa'amanatu ai pea iā i latou le tapula'a maua o le olaga e mana'omia e le Atua ina ia 'ausia e le tagata, o lē ua vala'auina e le Atua mo Lana fe'au o le fa'afeso'ota'i atu lea o le 'Upu o le ola i so'o se tasi lava.

Ia fa'amanuia tele e le Atua iā i latou o ē faitau ma su'esu'e i lenei tusi.

Tini Inu Lam Yuen

MO LE FAITAU TUSI

Ua toe lolomiina lenei tusi, **"O LE FAILAUGA O LE 'UPU MONI,"** e pei o na talosagaina, ma le fa'amoemoe ia maua atili ai se fesoasoani mo i latou ua talia le vala'au e tala'i le 'upu moni o le malō o Keriso. I le tausaga e 1978, le tausaga fa'ai'u o lana tautua mo le Ekalesia, na fa'amaopoopo ai ma lolomiina e Pastor Tini Inu Lam Yuen o matā'upu ma fa'avae o a'oa'oga auā le a'oa'oina o le 'au faigaluega ma failauga, a e maise ia maua ai le agava'a o le folafola atu. O matā'upu ma manatu o lo'o tu'u fa'atasia i lenei tusi e mai tusiga 'ese'ese mo le 'au faigaluega a le Ekalesia, e i ai le **"Ideal Ministry"** (**"O le Galuega i le Faiva o le 'Au'auna Atu"**), **"Training Light Bearers"** (**"A'oa'oina o le 'Au Fa'asusulu Malamalama"**), ma le **"The Art of Preaching"** (**"O le Agava'a i le Lauga Atu"**), ma na fa'aaogāina mo le a'oa'oina o le 'au "failauga nofo 'aiga" po o ē ta'ita'i i 'au lotu ta'itasi. O i latou nei o le 'au ta'iāla, o ē tutū malosi mo le aga'i i luma ma le manuia o le fa'asalalauina o le fe'au o le tala lelei.

Mo lenei lomiga fou, sa taumafai ia fou se va'aiga ma ia malamalama gofie fa'asologa ma lona tusiga, sa fa'asa'osa'oina fo'i ni mea na fa'alētonu, po o nisi suiga o mana'omia. E lē i ai se suiga i se matā'upu po o se manatu se tasi, ma o lo'o tumau le 'a'ano ma le loloto o le tusi.

O le fa'anaunau ia 'avea matā'upu ma a'oa'oga ua tu'uina mai i lenei tusi ma fa'amalosia'aga, ma ia ta'ita'iina ai 'oe, o se 'au'auna fa'amaoni mo le galuega o le fa'aolaina o agaga mo le Ali'i.

Fueainaula Tagaloa Tini Lam Yuen

O LE FA'ASINO MATĀ'UPU

MATĀ'UPU

ITŪLAU

O lē na tusia le Tusi
Alofa'aga molia o le Tusi
O nai upu e fa'atatau i le Tusi
Mo le faitau Tusi
Āta o le Fa'ava'a

VAEGA I: O le Tapula'a o le Tagata Folafofa	1
1. O le Galuega Sili mo le Matai	2
2. O le Olaga mo le Failauga a le Atua	4
3. O le Tapula'a Sili ma le Maua'uga	6
4. O le Tulafono Tatau mo le Failauga O le Alofa fa'ale-Lagi	10
5. O le Matā'upu Fa'avae a le Failauga O le Afioga a le Atua	14
6. O le Galuega Maa'e a le Failauga Folafofa atu Keriso	18
7. O Lē la te Galulue Fa'atasi O le Agaga Pa'ia	22
Fesili e Su'esu'e ai mai le Vaega I	25
VAEGA II: O le Failauga ma lona Galuega	27
8. O le Lauga Sauniuniga ma le Su'esu'ega	30
9. O le faiga o le Lauga O La'asaga e aofia ai	33
10. O itū'aiga o Lauga ma Āla e Galuea'iina ai Lauga e ta'ua o le Extempore O le Manuscript Lauga e ta'ua o le Memoriter	36
11. O Lauga 'Ese'ese ma le Fa'atulagaina Expository Sermon (Lauga Esepotesione)	40
12. Textual Sermon (Lauga Tekesituala)	43
13. Topical Sermon (Lauga Topikale)	45
14. Contrast Sermon (Lauga Konatalasi)	47
15. Typical Sermon (Lauga Tipikale)	49

16.	Biographical Sermon (Lauga Paiokarafi)	51
VAEGA III: O le Failaūga a le Atua		53
17.	O nisi Fa’atonuga mo le Failaūga	54
18.	O Āla e tali atu ai ē Fesili	56
19.	Sauniga o le Falelauasiga	59
	Fesili e Su'esu'e Loloto i ai mai le Matā'upu	61

VAEGA I

O LE TAPULA'A O LE TAGATA FOLAFOLA

Ia pei o Keriso i lona tū atu e 'avea o Lona lava sui, ma ua i lona loto ma le manatu o le fe'au fa'ale-lagi, atoa ma lona mautinoāga o ia o Lona lava sui, a e 'aue ne'i fa'apea ona o le tofiga tu'u fa'asolo i le faiva o felāuga'iga po o le vala'au fa'ale-tagata. Peita'i ia o'o ifo i le ta'ele o lona loto lea vala'au mai le Atua, ma ia 'avea lenā ma āla e u'una'iina ai o ia e momoli atu o upu moni o le afioga a le Atua, o fe'au lava ia mai le Atua.

Ia 'avea lea fe'au o se fa'aaliga lava mai le Atua mo le tagata, ma 'avea lona fa'amalamalamaina o se ta'ita'iga e galue ai le Agaga Pa'ia. Ia 'avea ai e pei o se afi i lona lava loto, ma ia liligiina atu i taliga ma loto o ē ua fa'atalitali mai, o fe'au ia mai laugutu ua pa'i atu i ai le afi mai le fata a le Atua. *O le mea lenā e ta'ua o le lauga moni, ma o le failauga fa'amaoni lava lenā a le Atua.*

E ui ina tele nisi āla e fesoasoani ai i le tala'iina o le tala lelei, e i ai sauniga o āta malamalama, A'oga fetusia'i o le Tusi Pa'ia, A'oa'oga i le fa'aaogāina o le laupapa, ma isi lava 'auala e tele ua saunia lelei, a e peita'i o le fa'afeso'ota'i atu i le fa'aaogāina o 'upu fetau lelei, o le tulafono mau lea e 'avea ma mea faigaluega tumau o le tala'iga o le tala lelei.

E lē mafai ona tatou va'aia o le mamalu ato'atoa o le Matai o le galuega, e āla lea i le tu'uina mai o le fe'au folafola, se'ia vaganā ua va'aia i tatou o ni failauga ola, o tutū atu i luma o fa'apotopotoga o tagata e fia maua le ōla ma ua 'avea ai le lauga atu o le **mana** o le Atua. *O le tagata i le 'Upu, o le 'Upu i totonu o le tagata, o le 'Upu Moni lea ua 'auāla mai i le tagata* – o le 'autū mausalī lea o le tala'iina o le tala lelei.

O LE GALUEGA SILI MO LE MATAI

I. O se fa'amalamalamaga.

O le ā le galuega sili? O le galuega sili o lo'o i ai i le olaga lenei, o le fe'au lea fa'ale-lagi ua faia mo tagata uma e lavea'iina ai, ma fa'aolaina ai i lona autū sili, e pei ona fa'atatauina e le Atua mo le tagata i le amataga. E ta'ua lea i lona i'uga, o le "Fa'aolataga a le lagi." O isi galuega e faia e tagata e tofu ma lona aogā, pei o le foma'i, gaosi 'oloa, faiā'oga, fai fa'ato'aga. Peita'i, o lo latou aogā e gata mai lea e tusa ma le tino mai o le galuega.

O se fa'ata'ita'iga, o le foma'i e fesoasoani ina ia toe fa'afo'isia le malosi i se tagata na manu'a ona o lona onā. A lelei lona manu'a ma ua toe malosi, e toe fo'i atu lava o ia i lona olaga e masani ai o le onā. E fa'apenā fo'i i le faiā'oga, na ona ia a'oa'oina tamaiti a'oga ina ia maua le tino o le poto. E maua e lea faiā'oga lona totogi, e aogā i le tausiga o lona aiga. O lana galuega fo'i e gata mai lona malosi i le tu'ugamau ma le aso e oti ai.

E lē fa'apea la le galuega o le Fa'aolataga. Afai o 'oe o se failauga, ma ua e faia lea galuega lelei o le fa'afeso'ota'i atu o le galuega o le fa'aolataga i se tasi tagata, ma i'u ai ina fa'aolaina lea tagata i le satauro o Iesu, o lona uiga e o'o atu le aogā o lea galuega ua e faia i le malō o le lagi, i tala atu o le tu'ugamau.

II. O le galuega ma lona aogā tumau.

Ia tatou su'esu'e po o ā ni 'auala e mafai ai ona 'avea 'oe o lē e fa'afeso'ota'i atu:

1. **Mare. 5:19, 20.** — O le tali atu a Iesu i le tagata na faamaloloina, "Alu atu ia 'oe i lou aiga, ma ta'u atu o mea tetele ua faia e le Atua ia te 'oe"
2. **Mata. 24:14.** — "E tala'iina atu fo'i lenei tala lelei... e fai ma molimau i atunu'u uma, ona o'o mai ai lea o le gata'aga."
3. **Mata. 28:19, 20.** — Fa'atonuga tu'u sa'o lava i le ekalesia. Ia alu atu ma a'oa'o atu i mea uma ua fetalai mai ai le Faaola. E maua lava so'o mo le malo o le Atua pe a o atu le 'au uso e fai lea galuega.
4. **Neemia 6:7.** — O le a logo atu e tusa ma ia 'upu... o se fe'au e āo ona logoina atu po o le fa'ailoa atu fo'i.
5. **Iona 3:2.** — Ua 'auina atu ma se fe'au fa'apitoa... e mafai lava e le Atua i Lana silafaga poto ona 'auina atu 'oe i se tagata, po o se aiga, po o se nu'u e te fa'ailoa atu o Lana fe'au.

I la tatou va'ai atu i lenei fe'au tele o le fa'aolataga, ua mafai ai ona tatou maua o le lagona ona o molimau ua tatou su'esu'e i ai e fa'apea, o le 'auina atu po o le alu atu fo'i, alu atu e logo ina atu, po o le ta'uina atu, ma a'oa'o atu, e mafai ai lava ona tatou tu'u fa'atasi nei fuaitau i le igoa lea, "o le tagata folafola," po o le "failauga o le tala lelei."

Ia laugaina le fe'au e le failauga e i ai le ola. O le uiga o lea la'asaga, o ia o le tagata filifilia o le Atua, e i ai le ola i le galuega ua vala'auina o ia i ai. O lona tulaga saunia lelei mo lenei fe'au, ma ia ato'atoa lava ona tu'uina atu o ia i le Atua e tusa i le galuega o le feso'ota'iga na te faia.

O LE OLAGA MO LE FAILAUGA A LE ATUA

I. O se fa'amalamalamaga.

E mana'omia e le Atua o se tapula'a ia 'avea ma sini o le olaga o lea tagata folafola, ma o lea tapula'a ua tatou maua mai i totonu o le tala i ē na filifilia mai auga tupulaga o le Tusi Pa'ia i taimi uma lava. Ua āla ona ta'ua le 'au failauga o "Sui o Keriso," ona o la latou fe'au tau'ave i luma o le lalolagi (**II Kori. 5:19, 20**). O ali'i ma tama'ita'i, o ē sa molimauina le alofa o le Atua i luma o tagata o le lalolagi, ua latou faia o se galuega tele e lavea'iina ai tagata mai le fa'afanoga.

Manatunatu i le tala iā Iosefa ma lana molimau sautualua, o lona fa'atuatua i le Atua ma lana amio mamā i luma o malō, a o le tala fo'i iā Mose ma lona loto tele e tū atu i le tupu sauā o Farao, ma na faia o se galuega tele mo le Atua. O i latou ia na tutū atu ma le loto tele ma le fa'amaoni tusa lava pe pa'ū ifo le lagi i o latou luga. O le itū e aupito i sili ona tāua, o le su'esu'e ifo lea o le tagata i lona loto ma lona olaga, pe i ai se itū o lo'o pau ai pe itiiti ifo ai i lō le tapula'a ua atofaina e le Atua. A mautinoa loa lea la'asaga, ona sa'ili loa lea o le fesoasoani fa'alugā ma ia fa'aleleia uma lava o ia la'asaga o lo'o fa'alētonu ai, ma ia mua'i maua e le failauga o lea tapula'a a o le'i lauga atu.

II. Tapula'a o le olaga e mana'omia e le failauga.

1. Ia ta'uamiotonuina.

O le mea lea e faia e le Atua mo 'oe, ina ua e gaua'i atu iā te Ia. E fai fua e Ia o galuega o le fa'amagaloina o āu agasala, ma 'avea ai 'oe o se tasi e tū atu e pei lava e te le'i agasala. O upu ia ua tatou maua i le Tusi Paia, "ua ta'uamiotonuina i le toto o Iesu," "ta'uamiotonuina e aunoa ma galuega o le tulafono," "ta'uamiotonuina i le maliu o Iesu," "ta'uamiotonuina e aunoa ma galuega o le Atua iā i tatou," a ia gaua'i atu iā te Ia ma le loto salamō.

2. Ia fa'apa'iaina.

Pe a ta'uamiotonuina le tagata, ona soso'o loa lea ma lenei la'asaga tata. Ua fesili mai Keriso mo le tulaga o le fa'apa'iaina ato'atoa lava o le loto, le mafaufau ma le malosi. O lea la'asaga o se galuega fai fai pea lea i aso uma lava, o le galuega o le olaga atoa. *Aufaigaluega o le Tala Lelei*, itu. 111.

3. Ia fa'amaoni ma ma'elegā.

Pe a fa'ae'e mai se galuega tau'ave i se tasi, e lē o tu'uina mai ai ma se fesili e fa'apea, po o ua maua e lea tagata le poto, pe tamao'aiga fo'i; a e pe

fa'amaoni lona olaga i ana mea e fai, pe ma'elegā fo'i ma to'aga. A lē 'ausia o ia la'asaga e lē mafai ona fa'ae'e atu i ai se galuega. *Tautinoga, Tusi IV*, itu. 413.

4. Ia loto maulalo.

O le fua lea a le Atua e filifilia ai tama'ita'i ma ali'i mo Āna fe'au. Ua fesili mai o Ia e fa'apea, "Pe mafai 'ea ona 'Ou tu'uina atu o A'u 'upu i o latou gutu?" Ma e "Pe mafai ona latou savavali ma A'u ma le loto maulalo?" *Tautinoga, Tusi VII*, itu. 144.

5. Ia fa'atuatua ma loto tele.

O le galuega a le Atua ua faia lava i le agaga o le fa'atuatua ma le loto tele. O le fa'atuatua ola lea e galue i le alofa e tosina atu ai lona agaga i le lagi a o ia tatalo atu mo le ta'ita'iga mo lana galuega, ma ia loto tele o ia i taimi uma lava e feagai ai ma tulaga e ōno fa'avaivai ai o ia. *Galuega fa'a-Kerisiano*, itulau 242.

6. Ia tautala ma le fa'autauta.

O le tautala atu ma le fa'aaogāina lelei o le gagana mamā e 'avea ai o ia o le tagata e tosina tagata i le olataga. Tatou fa'amasani ma le fa'aaogāina o 'upu matagofie, ma le logoleleia, auā o le taliaina po o le te'ena ina fo'i o a tatou feso'ota'iga e fa'alagolago atu lava lea i la tatou gagana e fa'aaogāina. *Galuega fa'a-Kerisiano*, itulau 223.

7. Ia onosa'i.

E leai se au'upega e mana'omia tele e le failauga e tutusa lona aogā ma lea uiga o le onosa'i. Ia a'oa'oina lea la'asaga i le olaga fa'ale-galuega. Ia e onosa'i i mea e tigā ai, o le 'upu fa'a loto tele lea i ē uma lava e feagai ma le galuega a le Atua. E manumalō le tagata onosa'i. *A'oa'oga a Keriso*, itu. 60, 61.

O LE TAPULA'A SILI MA LE MAUALUGA

I. Fa'amatalaga mo le matā'upu.

1. O lana galuega: Ia fa'aato'atoaina le tagata iā Keriso.

O le galuega mae'a a le failauga, e lē o le lauga ua mae'a ona tu'uina atu, a o le tosina mai o le agaga i le fa'aolataga. O le i'uga lea ia tausisi i ai le lauga ina ia na faia i taimi uma lava. E saunia ma fauina le lauga ina ia mafai ona toe fausia le tagata. O le foma'i e aogā lana galuega i tagata mama'i, e fa'apea fo'i le galuega o le tala lelei, lea ua avea ai 'oe ma tagata folafola i lona fa'agaoioi ina. O le ki lava lea ia tausisi i ai le galuega uma a le failauga.

O lona fa'amoemoe i aso ta'itasi, i sauniga uma lava po o avanoa uma ua tu'uina mai, e lē na o le fa'alelei o le olaga e masani ai; e lē o le si'itia i luga o le atamai, peita'i, o le fa'aolataga, ma ua 'avea lea o le sini o lana fe'au. O le ā le uiga o lea faitau, o le fa'alelei o le olaga e masani ai, po o le si'itia i luga o le atamai?

2. O le a fa'amalamalama atu e fa'apea:

O le **Failauga** ua ulufale atu i le aiga o **Lafai** e fai ai lana a'oa'oga. Ina ua mavae atu se taimi, a o faia pea le a'oa'oga e le failauga.

Sa fesili loa **Lafai** e fa'apea: "Fa'amolemole lava failauga, se'i 'ou fesili atu lava iā te 'oe, pe i ai 'ea se leaga o lenei matā'upu o le inu 'ava?"

Tali **Failauga**: "Ioe, o se mea leaga ma le fa'amaumau tupe."

Toe fai atu **Lafai**: "Fa'amatala mai e 'oe le fa'aaliga lea sa e faia nei."

Fesili atu **Failauga**: "O le ā le tele o lau inu 'ava i le vaiaso?"

Tali **Lafai**: "E maua lava le 20 fagu pia i le vaiaso."

Toe fesili atu **Failauga**: "O le ā le tupe e te fa'aāluina i le vaiaso?"

Tau mafaufau **Lafai**, ona fa'apea mai lea: "O la'u faitau e tusa e maua lava le \$5 i le vaiaso."

Fesili atu **Failauga**: "O le ā lau faitau, ua fia tausaga talu ona e inu 'ava?"

Tali mai **Lafai**: "Ou te manatu po o ua atoa nei le 30 tausaga talu ona 'ou inu 'ava."

Nofo nei **Failauga** ma se'i ane lana 'api la'itiiti ma ua galue ai ona lima ma le mafaufau, ona fa'apea atu loa lea o ia iā Lafai: "A fa'aopoopo uma lau tupe ua alu i lou tagofia o le 'ava pe tusa o le \$4,800."

Ua te'i mai le mafaufau o Lafai ma ua lūlū lona ulu. Ona fai lava lea o la la'ua talanoāga, a o le mafaufau o Lafai ua alu tele lava i le tele o āna tupe ua fa'amaumauina.

Fa'aopoopo atu i ai ma nai fuai'upu a **Failauga** e fa'apea, "E lelei pe 'ana fai o lenā tupe telē ua e fa'aaogāina i ni mea aogā, e i ai le fa'atau ai o lavalava o la 'oulua fanau."

Ona fai mai loa lea o le ta'utinoga a **Lafai**, "Ou te lē toe tago atu lava i lenā suāvai leaga." Fa'amavae loa Failauga ma Lafai. O lenei Lafai ua taumafai lava ina ia lē toe inu 'ava, auā o le mea e fa'amaumau ai tupe.

Ua o'o i se tasi aso, po o ua atoa le lima vaiaso talu mai lea a'oa'oga na ia maua mai iā Failauga. Ua malaga pō nei ia e aga'i i le taulaga i lana fe'au. Ua la feīloa'i ai ma Pai i le pasi lea sa malaga ai. A o alu pea le pasi, sa vala'aulia Lafai e Pai, ina ia lā feiloa'i i le fale o Tui pe a uma a la'ua fe'au. Ua fa'apenā lava ona faia. Sa alu atu Pai ma fagu pia e fā e fai ai lo la aso ma lana uō o Lafai. Sa mafaufau nei Lafai i lana ta'utinoga sa fai iā Failauga, toe manatu ifo, ailoga e i ai se afāina, auā e leai sana tupe e alu ai i lea inuga. Ma e moni lava lea i'uga ua tau i ai lona manatu. Sa toe fa'asaga atu loa o ia ua toe inu.

O le fesili la e tusa i lenei mea ua aliali mai, pe mata ua maua e Lafai le manumalō i le olaga e masani ai? Na ona si'itia i luga o le atamai o Lafai, ona pau lea o le la'asaga ua o'o i ai. Ia manatua lenei la'asaga ua aliali mai, ua na o le fa'aleleia o lona aiga, ona e lē toe alu nei se tupe e fa'atau ai pia. A o le itū i le fa'aolataga, e le'i tosina i ai le loto o lenei tagata.

II. O le Matā'upu.

1. Lauga fa'ale-olaga nei.

O lauga fa'ale-olaga nei e sini lana galuega ina ia fa'agaoioi le manatu ma le loto i se matā'upu o lo'o naunau i ai lea failauga, ina ia malamalama i ai i latou o lo'o fa'alologologo i lana matā'upu lea ua fa'autū i ai lana tautalaga.

2. Lauga fa'ale-Atua.

E tausisi lana galuega ina ia tosina le mafaufau ma le loto o le 'au fa'alologologo i le Atua ma Lana Fa'aolataga. E fa'amalamalama lelei iā i latou le āla manino ua fa'ata'atia mai i Lana Afioga tusia. O le i'uga o lana galuega ia maua e le tagata le Āla i le ola. O le itū tonu lea na tu'uina mai ai e Keriso o Ia lava i le ekalesia (**Efeso 4:11,12**). O le uiga tonu lea o le fa'atonuga lea i le **Mata. 28:19, 20: "Ia outou ō,"** ma ia maua so'o, ma a'oa'o atu. Pe a aunoa lā le lauga mai le pulela'a ma lenei tapula'a, ua lē o se lauga lenā mea. Ua 'avea le lauga o le poto fa'ale-Atua, pe afai e fusi atu i ai lenei tapula'a silisili, o le toe fa'afo'isia lea o le tagata i le fa'atusa o le Atua.

O le failauga la i lenei galuega, e lē o se faia'oga na te fa'amatalaina atu o uiga ese'ese o le Tusi Pa'ia, a o ia na te fafaguina le loto fuatia ifo,

ma lagona ai le mana'oga aupito i sili, o le sa'ili atu lea mo le Āla o le Fa'aolataga. O ē latou te faia lenei faiva o le folafola atu, ua latou tautala atu, a ua ui atu ai i a latou lauga po o a latou a'oa'oga le itū sili, o le feau lea a le Atua.

a. E lua itū tetele e tatau ona fa'ataunu'uina i le lauga atu.

i. O le ulua'i la'asaga o le "fai ma so'o," o le lavea'i mai lea o le tagata mai le oti e fa'avavau. E mafai ai e le tagata ona tū atu I luma o le Atua, ua ato'atoa ona saunia o ia i tulaga uma lava e aofia ai i lona fa'aolataga, e āla atu lea iā Iesu, ona ia ta'ua o ia o le atali'i o le Atua. O lea galuega ua mafai ona tatou maua mai i le Tusi Pa'ia lona fa'agaoiioina i soafuaiupu ia, "se'ia mai le afi," "lelei ma le Atua," "fa'aolaina mai le fa'asalaga o le agasala," ma isi lava ta'u. E mafai ai la ona tatou iloa iinei le tāua o le fe'au a le failauga; ona ua iā te ia o le autū e mafai ona lagona e le tagata o le la'asaga e filifili ai i āla e lua, o le ala i le ola, po o le āla i le oti e fa'avavau.

ii. O lona lua o le ati a'e lea o le tagata i le olaga fa'ale-Atua, ina ia mafai ai ona va'aia lona tuputupu a'e i le olaga fa'ale-agaga.

O se tasi la o nei la'asaga tetele e lua o lo'o ua aofia ai i lana fe'au. A aofia nei vaega e lua ma tu'ufa'atasia, o lona uiga ua tu'usaunoa tagata, e lē gata i le totogi o le agasala, peita'i, ua fa'asa'olotoina lea o i latou mai le mana ma le malosi o le agasala, fa'apea ma fua o'ona o le agasala se'ia o'o ina ato'atoa iā Keriso. O uiga uma e lelei ai, o le a fa'aopoopo mai i ai ma fa'aalia, a o alu pea le galuega a nei vaega e lua. O lo'o ta'ua nei vaega e lua i le Tusi Paia, "o le fa'alelei i le Atua," ato'a ma le "fa'apa'iaina."

b. O itū e lua e lē tatau ai ona o le sini maualuga o le lauga atu.

i. E lē tatau ona saunia le lauga i le va'aiga, i le na o le lauga, peita'i, o le tagata fou; i le ua 'avea ai fo'i le lauga ma au'upega i lona fa'ai'uga. O lauga o au'upega ia. Manatunatu i le 'au so'o o Iesu, tagata e le'i a'oa'oina i a'oga maualuluga i nā ōna pō, a e sa fuli fa'avae o le lalolagi i ā latou lauga, ma liua ai tagata e lē mafaitaulia i le malō o le Atua.

ii. E lē tatau ona manatu māmā i le galuega o a'oa'oga ma le tulafono o lauga. E tolu ma le 'afa tausaga o i ai le 'au so'o i le A'oga fa'amasani a le Faiā'oga Sili mo le a'oa'oina o i latou e fa'atatau i le fe'au sili o le folafola atu. I luga o 'auvai, i tafatafa o le sami, i 'auvae mauga, i totonu o fale o tagata mau'oa, i luga o le vai'eli, i aiga o telona ma ē agasala, i luma o fa'apotopotoga o tagata lautele, sa la fa'atinoina lea fe'au o le a feagai ma i latou. O Lona

leo manino lelei, ma 'upu logo malie fa'apea ma foliga tosina, sa 'avea lenā ma tulafono mau i le lauga atu.

Pei ona mua'i ta'ua, o lauga o au'upega ia. E ui i lea, a o ā galuega latou te faia? O ā fo'i ia mea faigaluega? O mea faigaluega ia ua matuā saunia mo le galuega e fai fa'atatau i ai, ma ia fetau lelei ma le galuega. O lauga fa'ale-agaga fo'i ia aga'i lava i le nofoāga e mafai ona gaoioi ai le uiga ma le amio a le tagata. O le tagata fou iā Keriso, o lona mana'oga silisili lea, o le toe mana'oga fo'i lea. Ia fa'apenā la ona aofia ma aofa'i fa'atasi mai uma fa'atatauga fa'ale-Atua mo le fa'aolataga i totonu o le lauga moni. Ma 'avea ai le lauga o le fe'au a le Atua, o le fe'au mai le lagi, o le matā'upu mai totonu o le fuafuāga o le fa'aolataga.

O le tula'i atu i le pulela'a ma le "afi i ivi," o le tigā mo agaga, ia pei lava o le fanau mai o le aso, ina ua oso a'e le lā mai lona afeafe.

O LE TULAFONO TATAU MO LE FAILAUGA O le alofa fa'ale-lagi

I. Fa'amalamalamaga.

E maualuga i mea uma le agaga o le alofa, ia alofa ato'atoa iā Keriso, ma le 'Upu Moni, i le ma tagata. Na fanaua mai e le alofa le Fa'aolataga, ma ua lofia uma lava lenei ala i ona itū uma i le alofa. Auā “ua fa'apea lava ona alofa mai o le Atua i le lalolagi, ma ua foa'i mai ai Lona Ālo e to'atasi” e maliu mo le lalolagi. Ua fa'apea fo'i ona alofa mai o Iesu Keriso i le fanau a tagata, ma ua tu'ua ai e Ia o mea uma lava ina ia tatou maua ai o le avanoa mo le sa'ili atu o le tofi na ave'esea e le fili. Ua fa'apea lava ona alofa mai o le Agaga Pa'ia i le lalolagi, ua Ia sau ai e mau fa'atasi ma le lalolagi i lona lē mamā ma lona leaga, o iinei o lo'o o i ai e o'o lava ina tigā ai ma manu'a ai ma te'ena ai.

O le tulafono atoa e i totonu o lenei lava 'upu: *"Ia e alofa atu i le Ali'i lou Atua ma lou loto atoa... Ia alofa atu i lē lua te tuā'oi."* E manino lava, o le alofa o le poloa'iga fa'atonu lea. O le alofa o le mea alofa sili lea o mea alofa. E ui lava i lea, a e ao ona tatou manatua, e i ai itū'aiga ese'ese o alofa o lo'o i ai i le lalolagi nei, ma e ao ona fa'avasegaina lelei, ma ia malamalama i ai le tagata folafola.

II. E ese'ese itū'aiga alofa.

1. Alofa e i ai le mafua'aga.

E ta'ua e nisi lea alofa o le alofa e fai lona tuā'oi. Pei o lenei se fa'aa'oa'oga; e vāvā mamao le fale o Simi ma Tui. Ua fo'i mai Simi sa faigaluega i le a'ai ma lana fasi povi, ma sa fai atu i lona to'alua o Mere e fai se kuka lelei mo le aiga. Sa fa'apea mai Mere, o lo'o i ai i'a e tolugalau na aumai iā Tui e fai ai sau mea taumafa. Ona sui loa lea o le fa'atonuga a Simi e fa'apea, ia e tago ma vaelua le fasi povi lenā. Ia e 'ave la le mea lenā na vavae iā Tui e fai ai sa latou mea 'ai. Ona fa'apena lea ona faia. Ua mafua ona 'ave le fasi povi, ona ua aumai i'a. E i ai le mafua'aga o lea mea.

2. Alofa fa'a-natura.

So'o se mea ola lava na faia e le Atua i le foafoāga e va'aia ai lava lenei uiga (natura) iā te i latou. Pei o le moa pe a toloa'i. Afai e ui ane se tagata po o se ta'ifau i tafatafa o lea moa ma lana toloa'i, e osofa'ia lava o ia e le matuā moa, talu ai lona alofa i āna tama. Ole tagata ola fo'i e mafai ona va'aia ai o lenei itu'aiga o alofa.

O se ali'i na fa'aipoipo i se tamaita'i, ma ua nonofo mo ni tausaga se fitu. Ua iā te i la'ua o se fanau e to'a lua. Na gasegase le tinā, ma ua maliu ai. Ua mavae ni masina, ma ua toe fa'aipoipo lenei ali'i. E alofa tele o ia i nei tamaiti e to'a lua. Sa fa'aalia fo'i e le tinā fou lona alofa i nei fanau a lana tane. Ua mavae ni tausaga na ua fa'amanuiaina lenei tinā, ua fananau mai se fanau i lo la aiga. A o tutupu a'e lenei fanau laiti, sa tauau ina sui le va'aiga i totonu o le aiga. Ua o'o ina amata ona alu le tasi o nei tamaiti laiti i le a'oga fa'atasi ma le to'alua matutua lea na fananau mai i lē ua maliu. E 'ave mea 'ai a nei tamaiti i le a'oga. E ta'i lua fasi falaoa a tamaiti matutua, a e tolu fasi falaoa a le tama la'itiiti. Ona tatou fai lea o le fesili e fa'apea, Ai se ā ua fa'apea ai ona fai? Talu ai ona o lenei tinā na fanau mai ai le tama itiiti lenei e tolu fasi falaoa o lana mea 'ai; a e leai sona tino (natura) i le isi to'alua. E ta'ua fo'i e nisi lenei itu'aiga alofa, o le "alofa fa'apito."

3. Alofa fa'ale-lagi.

O alofa ia ua ta'ua muamua i lenei a'oa'oga, e ola mai lava le tagata ua i ai i lona tino, ona o le tulafono o mea na faia e le Atua. Peita'i, o le alofa fa'alelagi, o se mea lea e lē o i totonu o le tagata, a o vāvā mamao o ia ma le Atua. O le alofa lea e ao ona maua mai le Atua ina ua talia ato'atoa e le tagata le fa'aolataga a le Atua. A maua lea alofa, e ao ona fa'amalosia pea lava pea i totonu o le olaga i aso ta'itasi. O le alofa la lea e ao ona pulea ai le mafaufau ma le loto o le failauga.

O le galuega o le tala lelei, a aunoa lana tala'iga ma lea, ua leai lava sona aogā. O le tagata, o lē ua vala'auina e momoli atu le tala lelei i ē a fano, e ao lava ona i ai le fa'atuatua, o le fa'atuatua lea "e galue i le alofa." E ao ona tautala o ia i le 'Upu Moni a le Atua, peita'i, ia lagonaina o ia o "tautala atu i le 'Upu Moni ma le alofa."

O lē poto i gagana, e 'avea ma 'apa memea ta'alili pe a leai se alofa. Ole mea fa'atauva'a ma le lē aogā le poto pe a aunoa ma le alofa. O taulaga maua luga uma, e o'o lava i le tu'uina atu o le ola ma le tino, e leai se aogā pe a lē faia ia mea a 'avea o le fua o le alofa. E mafai ona foa'i atu e se tasi o ana mea a e lē o iā te ia le alofa, a e lē mafai ona alofa o se tagata e aunoa ma le pulea i le uiga o le alofa, o le foa'i atu lea.

O Paulo o ia o le tagata a'oa'oina lelei, o le aposetolo fo'i o le mafaufau. Na si'itia mai e ia o mea tāua sa ta'uta'ua ai tagata. Faitau so'o ma mafaufau lelei i le **I Korinito 13**, e fa'atatau i uiga e ao ona aliali mai i lē ua o'o atu i lea alofa. O le fuaiupu 4 - 7 (**F. 4 – 7**) o lo'o ta'ua mai ai o fua maua luga e va'aia i le olaga ua na 'ausia lenei alofa fa'ale-lagi. Na pulea uma ai mafaufauga o lenei failauga o Paulo. Sa fa'afelanua'i ai o ana lauga. O le mea lilo lea o lona malosia. E ui ina va'ai atu tagata o ia o le tagata e finau ma le a'oa'i atu, a o ia o le tagata e tumu i le alofa fa'ale-lagi.

O le molimau moni lenei, e leai se tasi o aposetolo e sili atu le loloto o le alofa na ia lagona ina, ma tu'uina atu ai o ia iā Keriso ma Lana ekalesia ma le agaga moni fa'aola e pei o Paulo. E apoapoa'i atu o ia i tagata i le ao ma le po, a e apoapoa'i atu ma loimata e pei o Lona Matai. Na liligi atu e ia o le faula'i o lona naunauta'i, o le naunauta'iga e matuā iloga i le alofa malosi ma le fa'aapelepele. O le alofa la lea e ao ona si'omia ma ia pulea ai le loto ma le olaga o le failauga a le Atua. O le alofa lea e lē fa'amatalaina i 'upu, a o gaoioiga va'aia e fa'amatalaina ai. Po o fea lava e tusi atu ai o ia, o Efeso, po o Kolose, Tesalonia po o Filipi, po o Roma fo'i, e tasi lava le ala ma le leo sa fai a'i (**I Tesa. 8,10; II Kori. 12:15**). Pe mamao le 'au uso e mana'omia le areto o le ola, e malaga lava i ai lenei au'auna fa'amaoni a le Atua, pe faigatā le ala, pe tau malūlū fo'i aso, a e sa lē fa'afiti ai lava o ia mai le folafolaina atu o le 'Upu Moni e ola ai. Sa ia ta'utino fo'i e fa'aapea, "ua atu lasi ona fetogia o a'u i ma'a, afātia o folauga sa 'ou malaga ai, i le ma'alili, ma le fia 'ai... " a e sa le'i fa'avaivai ai lava.

O outou o failauga o le galuega sili, po o ē o lo'o sauni atu mo le galuega o le folafola, o ē ua i ai i o latou fa'amoemoe le tu'uina atu e fa'aaogāina e le Ali'i, o la outou fa'aa'oa'o lenei, o Paulo. Sa 'avea o ia ma mea uma i tagata uma, ina ia maua lava nisi mo Keriso.

Ia tautala atu i le 'Upu Moni ma le alofa, o le totonugalemū ma le fatu lenei o le au'auna atu i le faiva o le folafola; o le tulafono mau lava lenei o le lauga moni. O le uiga lenei a lē aofia atu i le 'ave fe'au ma le fe'au, ona tusa lea o le fe'au ma le afi e leai sona vevela, po o le tino e leai sona ola. O lenei uiga fa'ale-Atua, e mai le Atua lava, o le mea e ao ona tuputupu a'e. O lona pulea o le tagata, e ao lava ona ui mai i le fa'amamāina. E pei o le manogi e i le fugāla'au, po'o le matagofie i le nuanua, e fa'aapea fo'i ona i ai o lenei uiga i "le lauga atu." E silasila atu ma le fa'anoanoa le Atua i ē folafola o mea lilo o Lona finagalo, o ē ua ō atu i le galuega ua togia ai i latou, a ua fa'a leai se 'alo o lenei alofa i o latou loto. Latou te mafai ona lauga atu i matā'upu ofoofogia tau le Atua, i le malosi e tosina ai le fa'alogi a tagata, atoa ma isi uiga uma e fa'amamaluina ai lo latou vala'auina, a e 'avea i latou ma ē e tu'i i le matagi pe a aunoa i latou ma lenei la'asaga silisili ma le maua luga.

Pe fa'aapefea ona faia ia loloto le alofa ma galuea'iina se'ia o'o ina pulea ato'atoa ai le failauga? O le mafuta fa'atasi ma le Agaga Pa'ia, manatunatu e lē aunoa iā Keriso, mafaufau ma le naunau atu i le matā'upu ua i le loto, o le mea lilo lenei. Ia asiasi pea i Kalevario, ma nofo lata atu i le satauro. Ia va'ai i fofoga o Lē na fa'asatauroina. Pe a ua faia 'oe i le fa'atusa o Lona alofa fa'alelagi, ma fa'ata'eleina i le agaga ma le mana o Lana taulaga, o le ala lenā (*Ia*

*faitau so'o i tala i le fa'amasinoga ma le fa'asatauroina o Iesu: **Mata. 26; Ioa. 22, 23).***

O LE MATĀ'UPU A LE FAILAUGA O le Afioga a le Atua

I. O se fa'amalamalamaga.

Pe afai o le tapula'a silisili o lenei galuega, o le "fa'a'ato'atoaina lea iā Keriso," o lona uiga la, o le mea na te fa'a'ato'atoaina le tagata, o le mea lea e ao ona lauga ina atu. Sa tatalo Iesu e fa'apea, "*Ia e fa'apa'iaina i latou i lau 'upu moni*," i le, e lē o so'o se 'upu moni e fa'atatau i ai, auā sa Ia toe fa'aopoopo o ia 'upu, "*O lau afioga o le 'upu moni lea*." O le folafola atu o le 'upu, o le fa'atonuga tu'u sa'o lea ma le Atua i Āna 'ave fe'au, o le 'au perofeta, ma le 'au aposetolo.

E tolu la itū e ao ona malamalama ai ma mautinoa e le failauga, ina ia fa'atulaga sa'o ai lenei fesili e fa'atatau i le mea e ao ona tautala atu ai o ia i lana galuega: a) 0 lona tulaga; b) 0 lona fa'atonuga; c) 0 lana tapula'a.

II. Fa'amatala o itū tetele e tolu.

1. Ta'uina mai e le Afioga a le Atua.

E ta'ua o ia i totonu o le Afioga a le Atua, "**o lē e tau'ave le fe'au mai le Atua.**" E lē mai iā te ia le fe'au. Pei lava o ia o se amepasa mai lona malō i se isi malō, o ia o le sui mai lona malō e fa'a'ailoa atu le uiga ma le tulafono a le faigā malō lea e sui mai ai. Na te fa'alauteleina i āna tautalaga le mafua'aga o le uiga o le maliu mai o Keriso i lenei lalolagi, o Ia o le Atua ua liu tino tagata ina ia toe maua e le tagata le malō e fa'avavau o le Atua.

2. O le fa'atonuga a Iesu i Lana 'au faigaluega.

O le fa'atonuga mulimuli a Iesu o lo'o i ai 'upu nei, "**Ia a'oa'o iā te i latou ia tausi i mea ua 'Ou fai atu ai iā te outou**" (Mata. 28:20a). Ia a'oa'o'ina atu i feso'ota'iga uma e faia e failauga o mea ua a'oa'o mai e le Tusi Pa'ia, auā o le finagalo fa'aalia lea o le Atua, e ao ona talia ma usiusita'i i ai o tagata. Ia taumamao le tagata folafola ma le fa'amamafaina atu o mea e lē o fai mai ai le Tusi Pa'ia.

3. O le folafolaga a Iesu.

"Ou te iā te outou i aso uma lava, e o'o lava i le gata'aga o le lalolagi" (Mata. 28:20b), o le folafolaga lē-ma-liua lea a le Fa'aola. Ia manatua lenei itū, o lo'o tū ai Iesu i tafatafa o 'oe i le taimi e te tautala atu ai i le fe'au a le Atua. O le ā la se isi mamalu (vi'iga) e te tu'u atu i le Atua e sili atu i lo le 'Upu Moni mai Lana Afioga e te fa'aaogāina ma le fa'amaoni, a o e a'oa'o atu?

Ia sa'ili ina ia tosina le tagata i le satauro e fa'aolaina ai, ona ati a'e lea o ia iā Keriso. E lē mafaia e se 'upu moni fa'ale-tagata o na faia o lea galuega. Atonu lava e mafai o na fa'apoto le tagata, a e na te lē mafai o na ave 'eseina ai le agasala, pe fa'asa'oloto mai iā te ia mai lana agasala, pe tatala fo'i iā te ia mai noanoāga o āna agasala ma le fa'afanoga e fa'avavau. Ia tala'i le 'Upu, ia lauga i le 'Upu. O le matā'upu la e tala'iina e le tala lelei, o le Tusi Pa'ia lea, le Afioga tusia a le Atua.

III. Su'esu'e lelei i uiga ese'ese e galue ai le Afioga a le Atua.

O Le 'Upu a le Atua e tutusa lelei lava lea ma le Atua i lona fa'aalia o le fingalo o le Atua mo le tagata. E tumau pea lava, ma e ao lava ona ola, auā ua molimau i ai lava Iesu, "E maua ai le ola e i latou o ē latou te a'ai i ai" (**Ioane 6:63**).

1. E pei o le samala e tu'i momomo ai papa (**Iere 23:29**).

O le fa'aaogāina o lea samala, ma o le tu'i auaua'i pea e i'u lava ina malepelepe ai le papa, o le loto lea.

2. Pelu e fa'atau ma'ai itū (**Eperu 4:12**).

O soāfuai'upu ia "o lo'o ola, o lo'o matuā galue fo'i," ua fa'ailoa mai ai o lo'o aogā pea i le taimi nei lea galuega o lo'o faia e le Afioga tusia, ma e o'o atu lava i le loloto o manatu ma filifiliga o le loto o le tagata, e toe suia lava ma gaua'i i le mea e mana'o i ai le Atua, pe a tatalaina le loto o le tagata.

3. Talitā e tete'e atu i ū fanafana o fa'aosoosoga (**Efe. 6:16**).

E lē aunoa ona fesaga'i le tagata ma fa'aosoosoga uiga ese'ese i lona soifuāga fa'a-Kerisiano, a e ona pau lea o le sulufa'iga e mafai ona sola atu i ai o ia ma saogalemū ai. Faitau i ai, ma ia ola ai i āna fautuāga lelei. Manatua le tala i le **Mataio 4**, i fa'aosoosoga sa feagai ma Iesu, ina ua uma ona fa'amaonia o Ia mo Lana galuega fa'a-Mesia.

4. Pama i Kiliata ("Balm in Gilead"), e fa'aaogā e foma'i mo agaga ua mama'i.

O le fa'atusa fetau lelei lea mo so'o se fa'afitauli e fesaga'i ai ma le tagata o le Atua, ina ua lē maua o se fofō e a'apa atu i ai.

5. O le fa'amafanafana mo ē ua loto momomo.

O lea pe a o'otia le loto i se fa'alavelave, ma ua leai se itū e liliu atu i ai e maua mai ai o se fesoasoani. Liliu atu loa i le 'Upu a le Atua, ma o i'ina lava e maua mai ai o le fa'amafanafanaga.

6. Suāu'u o le olioli mo ē fa'anoanoa.

E fa'apupula mai e le 'Upu a le Atua le loto ua fa'apogisāina ona o se mea ua tupu mai. E mafanafana e pei o le suāu'u i lona fa'aaogāina.

IV. O le fa'aaogāina e sesē ai.

1. Fa'aliliu i le fa'ale-agaga ma le sesē le Tusi Pa'ia po o a'oa'oga o i ai. Ua faia e nisi fa'apea ma fa'afetaui, ina ia maua ai o ni a'oa'oga fa'ale-agaga. Pei o lea ua faia i le a'oa'oga a Iesu i le fanau na ōle atu i le tamā: areto — alofa; i'a — faatuatua; fuāmoa – fa'amoemoe. E lē maua a'oa'oga fa'ale-agaga i so'o se a'oa'oga mai le Tusi Pa'ia.
2. Fa'afetaui sesē le Tusi Pa'ia, e pei ona faia ma fa'afetaui sesē le pepelo a le ti'āpolo, "e 'avea 'oulua e pei o ni atua, e iloa le lelei ma le leaga," ma ua fa'aopoopo atu o isi lava fa'amatalaga e ta'ita'i 'eseina ai i la'ua mai le mea moni na fetalai atu ai le Atua, ma i'u atu ai lava ina alu 'ese le tagata mai le mea moni.
3. O le si'i ma mimilo o 'upu, ina ia maua ai se fe'au fa'a ōna pō nei (fa'afoliga). O le si'i mai lea o se fuai'upu po o ni mau e fa'amaonia ai se taofi ua uma ona faia. Pei o lenei: O le fa'aaliga na tu'uina atu iā Peteru i le **Galuega 10:10-16**, ua si'i mai ai le fuai'upu e tasi, o le **F. 13** lea ua fa'apea mai ai le si'ufofoga, "Peteru e, ina tū ia i luga, ina fasi ma 'ai." O le 'auala e maua ai le uiga moni o se fuai'upu o le faitau atoa lea o le matā'upu, ona fa'ato'ā maua lea o le malamalama o le matā'upu e fa'atatau i ai lea a'oa'oga.

Ua fa'ai'uina loa le uiga o le fuai'upu lea i le a'oa'oga e fa'apea, talu ai ona o le fuai'upu, ua fa'atagaina mai ai e le Atua ona fa'aaogāina o so'o se manu e 'avea ma mea 'ai, e o'o lava i manu vaefā ia ua ta'ua mai i le Tusi Pa'ia, o manu 'inosia ma e lē mamā fo'i. Po o le ā se isi fa'apa'iaina o 'upu malamalama o le Tusi Pa'ia e sa'ilia e le 'au failauga e sili i lo le tamao'aiga o lo'o aumai lava i Āna Afioga? E ao lava ona 'aua ne'i si'i atu se molimau ma fa'apea atu, "Le 'au uso e, ua a'oa'o mai lenei 'upu ia fa'apea ma fa'apea," a e lē o fai mai ai lava le 'upu, ma e 'ese fo'i le mea e fa'asino i ai.

V. O itū tāua e maua mai le a'oa'oga o le lauga.

1. O le molimau po o se fuai'upu e 'avea ma fa'avae o le lauga (autū), ia taumamao lava ma le fa'aaogāina o ni molimau fa'afoliga. Pei o lenei, "o le fafine e mata'ū, a e 'aisi," ona si'i mai lea o le **Ioa. 4:15**. E ui lava ina foliga mai e logoleleia, a e leai, i le tulafono o le fa'aupuga o 'upu e sili atu e tosina ai le loto i le a'oa'oga. E lelei pe a fa'apea, "O le tamaita'i na mata'ū e avatu o sina vai inu, a e na 'aisi atu i lona fia maua o le vai o le ola."
2. O uiga e maua pe a fa'aaogāina o molimau mai le Tusi Pa'ia ma le fa'amaoni.
 - a. O fesuia'iga tetele i le lauga atu.
O 'upu e ui atu i le itū e lelei, i le folafolaina atu o manatu sili e lagona i le loto e fa'ale-agaga (positive).

- b. O fa'amatalaga aupito i sili o le Tusi Pa'ia.
E fou pea, ma e tāua i le 'au fa'afofoga le manatu po o le a'oa'oga mai le Tusi Pa'ia, ma tosina ai i le autū o le a'oa'oga.
 - c. O a'oa'oga silisili.
So'o se a'oa'oga lava e tu'uina atu, e 'avea lava o se mea mana'omia e le tagata o lē o lo'o sa'ili mo mea silisili o le olaga sautualua.
 - d. Fa'amamaluga maua luga ma le sili lea o le Agaga Pa'ia.
O le Agaga Pa'ia na 'au ai i le tusiga o lenei Tusi Pa'ia, ma o le a tu'uina mai fo'i e Ia o manatu aogā mo le lauga atoa lava. O le a fa'a'upuina lava e le Agaga Pa'ia na o manatu tāua o i ai.
3. O le filifilia lea ma le fa'atulagaina o le molimau e pei lava o musumusu mai ai Keriso, "Ua 'ou aumaia iā te 'oe le Afioga a le Atua i le asō." O le filifilia fo'i lea o le vaila'au sili e tatau mo le mana'oga i lea taimi.
4. O le mafaufau atu ma le su'esu'eina o le autū o le lauga, i le sauni atu mo lea sauniga ma lea sauniga, po o lea sapatu ma lea sapatu. E mana'omia le fa'aeteete ma le tatalo i galuega o le vaiaso. Ia fa'amasani lelei ma le Tusi a le Atua, o le ala lelei e filifilia ai ma le sa'o o mau e tatau mo le lauga, **"E ao ona savavali ma le Atua."**

O LE GALUEGA MAOA'E A LE FAILAUGA Folafola atu Keriso

I. O se fa'amalamalama.

E ui lava ina tele tapua'iga i ōna pō na fa'avae ai le Lotu Kerisiano, a e na o le lua lava itu'aiga sa feagai ai ma le galuega a le 'au aposetolo, o tagata Iutaia ia ma Eleni. E matuā ese'ese lava taofi o ia vaega e lua, ma o le āta lava lea o taofi o lo'o feto'ai ai pea ma le galuega i ōna pō nei. E lē o le fa'ailoga po o le poto e sa'ilia, a o le folafola atu o Keriso, o le mana Atua lea e ola ai (*Faitau ma su'esu'e i molimau nei: Galu 4:12; 5:42; 8:20; 9:20; I Kori. 1:20-23*). Sa malie gofie Iutaia i le lotu sa latou tapua'i i ai, ma ua 'avea lenā lotu ma atua iā te i latou. A o Eleni sa fesuisuia'i lo latou taofi e tusa ma la'asaga e feagai ai i lea taimi ma lea taimi (Manatunatu i le tala i le malaga a Paulo i Atenai, atoa ma lo latou malumalu sa i ai i le malae o tapua'iga).

A o le folafolaina atu o le fa'aolataga e ala ai lea i le Ali'i Fa'aola, o le galuega lava lea e tasi e ao ona faia, auā e na o lea le Āla e ola ai so'o se lanu po o se itu'aiga o tagata. Ua suia le taimi ma ōna uiga o mea e aliali mai; peita'i, o mana'oga ua leai se fa'amoemoe o ē a fano, e lē o suia lava. *E lē o suia fo'i le 'Upu Moni o le tala lelei o le Ālo o le Atua.*

II. Matā'upu o le galuega a le Failauga.

1. O le folafola atu o Keriso ma le lē malamalama i lona uiga moni.

O le uiga o le 'upu "kerisiano," o le tagata lea ua na talia Keriso, ma ua atagia ai foliga o Keriso i Lona olaga. Peita'i, o ōna pō nei, o se igoa ta'atele lea ua fa'aaogāina e tagata, a ua leai se iloa lelei o lona uiga moni i le olaga, ma ua leai fo'i se ele'ele o tutū ai vae o i latou ua igoa, ma ua latou lē iloa le uiga tonu o lea igoa. E fā itu'aiga o Kerisiano:

a. Kerisiano moni ma le fa'amaoni.

Ua ta'ua lea vaega i lea igoa talu ai ona ua latou fa'amaoni i le uiga ua faia e le mana fa'aola mai iā Keriso, ma ua vavae 'ese ai i latou mai tapula'a o le lalolagi pogisā ma le so'ona fai. O mea latou te faia e mai le ta'ita'iga a le Agaga Pa'ia lea.

b. Kerisiano i le tapua'iga lautele.

O le tagata lea na te lē iloa lava le tapua'iga tonu e taula'i atu ai lona agaga i le Atua moni. A alu ma nofo i se aiga e lē lolotu, ona lē lotu ai lea; pe nofo fo'i i se aiga e lotu i tapua'iga e lotu Kerisiano sasa'e, ona

fa'atasi lea i ai. E alu i le lotu a e na te lē o lagonaina se mea e tasi i lona loto.

c. Kerisiano sa'oloto.

O le tagata lea na te faia lava so'o se la'asaga e feagai ai ma lona olaga, i le lelei ma le leaga. E alu i le lotu, a e na te faia fo'i o so'o se agasala lava e tau atu i ai lona olaga. E fa'alētaupulea lona olaga i le vā ma le tapua'iga i le Atua.

d. Kerisiano na te lē o mautinoa.

Na te lē o iloa pe mautinoa lelei fo'i o le tala lelei o le mea faigaluega tumau lea e galuea'iina ai le olataga o le tagata mai le agasala, ma fa'alelei ai lona olaga i le Atua, ma sauni atu ai mo Lona malō. O lo'o i ai pea lava le mana'oga o taimi uma lava, o le 'alaga lea e fa'apea, **"Ia fo'i atu iā Keriso."**

Ia itiiti matā'upu e tu'uina atu, a ia tele le ola; o lona uiga o lea itū, ia itiiti lauga ma a'oa'oga, a ia tele atu i a'oa'oga e tosina ai i le ola e āla iā Keriso Iesu. Ia itiiti iā Paulo a ia tele iā Keriso. O le fa'aaogāina so'o e se failauga o se igoa e 'ese i lo le suafa o Iesu, o le a mafuli atu ai lava lana tautalaga i lea igoa. E ui lava o Paulo e ōna le tusiga, a o se itū lelei ona fa'apea atu, "Ua fa'a'iloa mai e le au'auna a le Atua," po o le fai atu fo'i ua "Tusia mai i le Afioga a le Atua," a lē o lenā ia ta'u atu, "O le finagalo lea o le Atua ua fa'a'iloa mai e Paulo." Pe afai e fa'aa'oa'o ma mulimuli le galuega a failauga i le fa'aa'oa'oga a ulua'i failauga, ia lē iloa se isi mea i tagata, a e tau lava o Keriso Iesu, o Ia na fa'asaturoina, na toe soifua mai, ma afio a'e i le lagi, o lo'o fautua ai mo a tatou agasala, ma ua lata ona toe afio mai. O lona uiga, o nei mafaufauga fa'alētonu ma le lē manino e fa'atatau i le uiga o lenei soafuai'upu, "Folafola atu Keriso," a ao lava ona mavae atu, a e aliali mai le 'Upu moni i lona uiga e lautele ma le ato'atoa.

2. O le folafolaina atu o Keriso o le Afioga tusia.

O le folafolaina atu lea o Keriso, o Ia o le Atua ma le tagata, e ato'atoa i Ōna itū e lua, o le fa'aalia mai o le Atua i le tino tagata, o le mea alofa silisili o le alofa fa'ale-lagi, ma o le mana lea i le fa'aolataga mai le agasala ma le oti e fa'avavau, i le togiola i le taulaga fa'a fautua i le fa'atuatua. O Iesu lava o le Atua a o i le lagi, a ua 'avea ma tagata e pei lava o i tatou i lenei lalolagi, ma sa soifua lava e pei o i tatou. A e leai se agasala iā te Ia (**I Pete. 1:1**). O le folafolaina atu o Keriso e ao lava ona aofia i ai tagata ola uma, auā o le fa'aolataga ua saunia e le lagi mo le fanau uma a tagata. Ia manatua le itū tāua lenei, **na tofo e Iesu le oti mo tagata uma lava**. O le vala'au la ua tu'uina mai e le lagi, o le vala'au lea a Keriso mo so'o se tasi lava, tusa lava po o le ā le itu'aiga tagata po o le lanu e i ai.

E ao ona ‘avea le fa’atū atu i luma o Keriso ma **mana i le fa’aolataga** mai le agasala ma le oti e fa’avavau. E le’i afio mai Iesu ma ‘avea ma matā’upu silisili lona fa’aolaina mai o le tagata mai ōna tigā fa’ale-olaga nei, pe gata mai Lana galuega i le a’oa’oina o le matā’upu o le toe fuata’iina o le amio. Afai fo’i o le tala lelei ua na o se fa’atuatuāga o mea lelei e faia e le tagata e sa’ilia ai lona olataga, o le a ‘avea le liu tino tagata o Keriso o se fa’aaliga, a e leai sona aogā mo le ola atalī. Peita’i, o le galuega lava o le fa’aolataga, o le galuega loloto lea e faia e le mana fa’aola o Keriso o le olaga agasala, auā o lona malosi o le puna lea ma le pogai o gasegase uma lava o lo’o mafatia ai nei lo tatou lalolagi.

Pe fa’aolaina fa’aapefea le tagata, ma o fea fo’i ua tu’uina i ai e le tala lelei le mana o Keriso e fa’aolaina ai? O Ia o le Fa’aola i Lana taulaga fa’a-Togiola ma le fa’a-Fautua. O le galuega na ui mai i le tigā ma le puapuagā. O le Togiola lava o le toto. O le failauga a le Atua ua ato’atoa iā te ia o au’upega e fa’aeaina ai le ola fa’ale-Atua, e i ai a’oa’oga, le ta’ita’iga ma le fa’aa’oa’oga atoa ma le alofa; ina ne’i lē ausia le tala’iga fa’a-aposetolo.

O le fa’atuatua i le amiotonu a le Ālo o le Atua, e fa’a’ofuina o ia e lea lava amiotonu, ma ta’uamiotonuina ai lava ona o lona fa’atuatua. O le mea foa’i fua mai lea a le Atua i lē na te talia le vala’au atu a le tagata folafola. Ua na o le tasi fo’i le auala e mafai ai ona taliaina ai e le loto o le Keriso na fa’ asaturaina — o le va’ai atu lea ma le fa’atuatua e talia ai le mana o le Atua iā Iesu na te ‘ave ‘eseina ai le agasala a le lalolagi. O le fa’atuatua o le a’a lea o le alofa. Peita’i, e lē mafai ona tatou fa’atuatua i se mea tatou te lē talitonu i ai. **O le salamō o le loimata lea i le mata o le fa’atuatua.**

III. Manatu fa’aopoopo mai le Agaga o Valo’aga.

O Autū lava nei ia ‘avea ma a tatou autū fa’aalia.

1. O Keriso na fa’asatauroina ona o ā tatou agasala.
2. Keriso na toe tū mai nai ē ua oti.
3. Keriso o lo tatou Puluva i luma o le Atua.
4. E fa’afeso’ota’i atu nei autū uma i le galuega fa’apitoa a le Agaga Pa’ia, o le Sui lē va’aia lea o Keriso.

O Lona mua’i afio mai i le lalolagi, fa’atasi ma Lona afio fa’alua mai i le mamalu, o ia ‘Upu Moni uma e taula’i atu i ai o matā’upu tāua uma o le fa’aolataga.

O LĒ LA TE GALULUE FA'ATASI O le Agaga Pa'ia

I. Fa'amatalaga.

I totonu o pisinisi fa'a lenei lalolagi, e i ai lava le tasi e maua mai ai o fa'atatau fa'apea ma fautuāga mo le manuia o lea galuega, ma e ta'ua lea tagata o le **“silent partner.”** O lenei fo'i ali'i e ato'atoa i fa'atatau uma e aofia i ai lana galuega. E lē mafai ona ato'atoa o lea galuega pe a lē tausisi atu i fa'atonuga uma e aumai iā te ia. E fa'apea fo'i i le galuega tele o le Malō o le Atua, ona i ai o le "silent partner," ma o Ia lea e galulue fa'atasi ma le failauga. O le Agaga Pa'ia lea, ma o Ia lava o le Sui lē ma-va'aia lea o Keriso i le lalolagi i le fe'au a le Atua. O le feso'ota'i ma Ia e 'avea ai le galuega o se fe'au e fa'amanuiaina. A ia manatua lenei itū tāua, e lē mafai ona tautala mai o Ia, a e mafai ona fesiligia o Ia i so'o se matā'upu lava tau le galuega a le Atua. Peita'i, e lē mafai ona tautala mai o Ia i se tagata masalosalo.

O le galulue fa'atasi ma le Agaga Pa'ia e ao ona faia i le fa'atuatua. Ina ia fa'amaonia le ala o le galulue fa'atasi ma le Agaga Pa'ia, e ao ona manatunatu i 'upu a le Ali'i Fa'aola a o fa'atasi ai ma Ōna so'o i le tino nei. Sa Ia fetalai atu, *"E aogā iā te 'outou pe a a'u alu 'ese, auā afai 'ou te lē alu 'ese, e lē maliu mai le fesoasoani iā te 'outou, a e afai 'ou te alu, 'ou te 'auina mai o Ia iā te 'outou"* (Ioa. 16:7).

Ai se ā e aogā ai le maliu 'ese o Iesu? E manino lava, auā o Lona itu lea i le tino va'aia sa i ai o Ia, ma e lē mafai ona i ai o Ia i mea uma lava i le taimi e tasi. O lea ua sili ai le maliu mai o le Agaga Pa'ia i lō le nofo pea o Keriso i lenei lalolagi. O lea na Ia tu'uina mai ai o folafolaga silisili e fa'apea, **“Afai 'ou te alu, 'ou te:**

1. ““Auina mai o Ia iā te outou,” ma fa'aailoa mai i le lalolagi le agasala, ma le amiotonu ma le faamasinoga:
2. “E ta'ita'i e Ia iā te outou i 'upu moni uma.” O 'Upu Moni o lo'o manino ona fa'aailoa mai e le Tusi Pa'ia, o Keriso, o le Afioga tusia a le Atua, ma le Tulafono pa'ia a le Atua.
3. “O Ia lava e vivi'i mai iā te A'u, ma fa'aailoa atu iā te outou mea uma lava; o le fesoasoani lea e 'auina mai i Lo'u igoa.”
4. “O Ia na te a'oa'o ma fa'amanatu atu o mea uma ua 'Ou fai atu ai iā te outou.”
5. “Ma o Ia lava e fa'amaligi mai le alofa o le Atua i o outou loto.”

6. “E fesoasoani mai i lo tatou vaivai fa’ale-agaga, auā tatou te lē iloa mea tatou te ōle atu ai ma le lē tusa.”
7. “O le Agaga Pa’ia e fautua o Ia mo i tatou i le oi e lē ma- talatalaina...auā o lo’o fautua o Ia mo le ‘au pa’ia e tusa o le finagalo o le Atua” (**Roma 8:26, 27**).

II. Matā’upu: O le sauniuniga o ē lauga e le Agaga Pa’ia.

1. Pe afai o le lauga o le mea moni fa’ale-agaga, (aofia i ai le agava’a ona ua a’oa’oina lelei, ma le mamalu) a e *fa’apupulaina, fa’aolaina ma fa’a’ato’atoaina* i lona i’uga e le Agaga Pa’ia. E iloa ai le ese’esega i le vā o le lauga moni mai le Agaga, fa’apea ma le tasi e maua mai i le ma’elegā o le tagata lava ia.
2. E o’o lava i sauniga fa’aopoopo e i ai le tatalo, faitauina o le Tusi Pa’ia, o pesega ma vi’iga i le Atua e maua sona aogā pe a tau lava ina i ai le Agaga Pa’ia i ia lava vaega. Afai o le a lē maua lea feso’ota’iga, o lona uiga ua na o mata’itusi ua tatou faitauina, ma e gaogaoina uma fo’i ‘upu uma e fa’aaogāina i le tatalo. O le fa’aaogāina na o mata’itusi o le Tusi Pa’ia, na te lē mafai ona si’itia o le lauga i le la’asaga e ‘avea ai lea mea faigaluega e na te fa’ao’oina le tagata i le fa’ale-agaga, se’ia vaganā ua aofia i ai o Ia, o le Agaga Pa’ia lea.
3. O le fa’atasi mai o le Agaga Pa’ia, e ui tonu mai lava lea i le laina o le malosi fa’ale-agaga ma le lagona i le loto. O le failauga na te taumafai e fa’ailoa atu le agasala i ‘upu o lana lauga (i ana lava fa’a’upuga) a o le galuega lenā na togia le Agaga Pa’ia na te faia (ui mai lea i le fa’a’upuga e maua e le failauga mai le Agaga Pa’ia). E na o Ia lava na te mafai ona fai o lea mea i le aga’i atu i le olaga liua — *o le tagata fou iā Keriso*; “**A lē toe fanau le tagata, e lē mafai ona iloa e ia le malō o le Atua**” (**Ioa. 3:3**). Peita’i, ia fanau iā te ai? O le Agaga Pa’ia. O lea e ao ai lava ona fa’asaga atu le failauga e matuā sa’ili le fa’atasi mai o le Agaga Pa’ia, auā o Ia na te faia le vaega aupito i sili o lenei galuega. E fa’apenā lava i matā’upu uma e aofia ai i le galuega o le fa’aolataga.
4. O le fa’atasi ai o le Agaga Pa’ia i le lauga, e amata mai lava i le taimi e filifilia ai le matā’upu, po o le fa’avae, ma le su’esu’ega i vaega ta’itasi uma e o’o lava i le taimi e tu’uina atu ai. Ua lē o le -taimi e lauga atu ai le failauga i ē fa’alogologo e fa’ato’ā mana’omia ai lona fa’atasi mai. E mana’omia o Ia i le galuega atoa lava, auā o Ia e galue mo ‘oe. Ia talitonu ma fa’atuatua i ai le failauga i lenā mea, ia pulea ato’atoa i le fa’atonuga uma o le sauniuni atu mo le pulela’a, o le tagata o i le Agaga Pa’ia, o le Agaga Pa’ia i le tagata.

5. O le faigaluega aupito i sili lea ona malosī o lo’o i ai i le lalolagi — a e *fa’atasi mai ma le filemū, pea lava pea, galulue ma le alofa fa’atasi ma Ia i le lauga*. O le ma’elegā o le tagata folafola e galulue fa’atasi ma lea faigaluega i lona ma’elegā e pei lava o Keriso ia, o le failauga lea, a o ia su’esu’e atu i fa’atataūga uma mo le galuea’iina o lea sauniuniga mo le malumalu ma le sauniga, po o se feso’ota’iga lava e feagai ai.

FESILI E SU'ESU'E AI MAI LE VAEGA I

1. 0 le ā le galuega sili o i le lalolagi nei i le faiva o le au'auna atu?
2. Ai se ā ua e manatu ai o le galuega sili lenā?
3. 0 le tulaga o ai lea e tū ai le failauga i luma o tagata?
4. Tusi mai le tapula'a o le olaga e tatau ona 'ausia e le failauga?
5. 0 le ā le uiga o ia la'asaga: O le failauga e i ai le ola? Le fa'apotopotoga e fia maua le ola?
6. Le tapula'a muamua ma le silisili o le galuega a le failauga, o le ā lea?
7. 0 ā la'asaga e lua e aofia ai i le galuega o le fa'aolataga?
8. 0 le ā le agaga ia pulea ai le olaga ma gaoioiga fai a le failauga?
9. Fa'aapefea ona maua o le alofa fa'ale-lagi e le tagata folafola?
10. Po o ua mafai 'ea ona e taulotoina le **I Korinito 13**?
11. Folafola atu Keriso — o le ā le uiga o lea la'asaga?
12. Po o le ā le galuega muamua ma le silisili a le tagata folafola?
13. 0 le ā le folafola atu o Keriso e tusa i le Afioga tusia?
14. 0 le ā le uiga o le igoa lea, "Kerisiano?"
15. Fa'amatala le (a) Kerisiano moni ma le fa'amaoni; (b) Kerisiano i le tapua'iga lautele.
16. 0 ai lea e ta'ua o le "*silent partner*" (po o le "*fesoasoani lē leoa*") i galuega o pisinisi o lenei lalolagi?
17. Fa'amatala le "*silent partner*" o le galuega a le Atua.

18. Fa'amatala manino le itū e lelei ai le maliu 'ese atu o Iesu i le lagi, a e sui mai ai le Agaga Pa'ia.
19. O ā galuega tetele e faia e le Agaga Pa'ia i Lona i ai i le lalolagi nei?
20. Fa'amatala lelei lou malamalama e fa'atatau i le Agaga Pa'ia.
21. O ā itū tetele o le galuega a le Agaga Pa'ia e faia i lau lauga e tu'uina atu?
22. Po o le ā le sini o lo'o i lou fa'amoemoe i lou fia faia o lenei faiva o le folafola atu?

-31-

VAEGA II

O LE FAILAUGA MA LANA LAUGA

I. Fa'amalamalamaga.

O lenei vaega e fa'asino lava lea i le failauga ma lana lauga, o le galuega lea e feso'ota'i atu ai o ia i le fa'apotopotoga o tagata, o lē ua mana'o le Atua ina ia logoina atu i ai le tala lelei o le ola. Sa tatou su'esu'e i le Vaega I e fa'atatau i le tapula'a o le olaga o le failauga e tusa ai ma le pa'ia o lea fe'au ua vala'auina i ai o ia e le Atua.

Ua mana'omia la ina ia tatou su'esu'e lelei lenei vaega, ina ia malamalama lelei iā i tatou lenei matā'upu e ta'ua o le lauga ma lona su'esu'ega. Ma ia 'avea ai le lauga o se matā'upu lava a le lagi ua aumaia i le lalolagi lenei e 'avea ma tali atu i le mana'oga o le tagata fia ola.

II. Fa'amatalaga o le matā'upu.

1. Su'esu'ega o le lauga:

Ia i ai sau pepa e ta'ua o le "itulau galue," e te tusi ai o manatu uma lava o lau su'esu'ega. O ni fa'amatalaga si'i mai mai le Tusi Pa'ia o ni tala e fetau lelei mai ia a'oa'oga ese'ese, ni molimau mai le Afioga a le Atua. A o'o loa lava ina fa'atulaga lau lauga, ona e tōina mai lea na o manatu ma mau e te lagona e fa'alautele ai lea a'oa'oga. Ona e tu'uina loa lea i se pepa o le va'ava'a e te fa'aaogāina i le sauniga.

2. E tolu itū tetele i le fa'atulagaina o le lauga.

a. Fa'atomuaga.

E aofia i le faatomuaga le **fa'avae** o le lauga, **po o le autū**. E aofia i ai le Tusi faitau, ma le matua. E lē gata i lea, o 'upu e fa'atomua ai le lauga. E saunia ai le 'au fa'afofoga e fa'afofoga atu i le matā'upu o le a tautalagia. E 'avea fo'i pese o le sauniga o le tusi faitau, ma vaega e fesoasoani ai i le fa'atomuaga. Ia lē tele ni 'upu o le autū po o le fa'avae. O se fa'ata'ita'i fa'apenei o nei autū:

i. "E tatau ona fanau fa'alua le tagata, ona fa'ato'ā maua lea o sona avanoa i le lagi."

ii. "O le ā le fa'amagaloga fa'ale-Atua?"

iii. "O le tagata fou iā Keriso."

iv. "O la'asaga e tolu e te uia ona e taunu'u lea i le lagi."

b. Tino.

E tusa i lau su'esu'ega, o lou fa'amaonia lea o le autū mai mea sa e su'esu'e i ai, ma tusia i le itulau galue. Aumai e 'oe tau o ni tala logo leleia atoa ma ni fa'amaoniga e atili fa'amausalīina ai le autū. E faitalia lava le failauga pe fia ni vaega tāua e aofia ai i lenei matā'upu.

c. Fa'ai'uga.

O le vaega lenei e i ai le **Ōlega** o le lauga atoa lava. Le mea e mana'o i ai le lauga ina ia lagona e le tagata ma faia. E ui lava ina to'atele tagata o le sauniga, a e pei lava o lau ōlega e faia i le tagata e to'atasi. Manatu i ōlega a i latou nei e tusa i a latou lauga:

Teut. 30:19 Le ōlega a Mose ina ua fa'ai'u lana lauga, "O lenei inā filifili ia i le ola, ina ia i ai 'oe atoa ma lau fanau."

Iosua 24:15 O Iosua fo'i na ōle atu i lana lauga fa'amavae i 'upu nei, "Inā filifili ia outou i le aso nei, po o ai tou au'auna i ai...."

Mata. 7:24 - 27 O Iesu fo'i sa Na fa'ai'u lana lauga i luga o le mauga i Lona fa'aaogāina o le fa'atusa fetau lelei, na Ia fa'apea atu ai, "Ai se tasi e fa'alogo i a'u 'upu ma faia e ia, 'ou te fa'atusaina o ia i le tagata poto, ua na faia lona fale i luga o le papa."

Luka 10:37 Ma le tasi fo'i o Āna a'oa'oga na Ia tu'uina atu ai o le ōlega e fa'apea, "Inā alu ia, ma ia fa'apea ona fai."

Gal. 2:38 Le ōlega fo'i a Peteru i lana lauga i le Aso Penetekoso, "Inā salamō ia, ma ia ta'itasi ma papatisoina outou uma i le suafo o Iesu Keriso."

E lē umi lenei vaega, ma e faia lava e le failauga e tusa ma lona lagona mai le ta'ita'iga a le Agaga Pa'ia e tusa ma le tulaga ua o'o i ai le 'au fa'afofoga.

Ua aofia ai i lenei Vaega II o lauga ese'ese e tusa ma o latou su'esu'ega, fa'atasi ai ma ni lauga e atili fa'amalamalama a'i e tusa ma o latou igoa. Peita'i e ui lava i na ese'ese i o latou ta'u ma igoa, a e āuga uma lava i itū tetele e tolu, pei ona i ai i le Matā'upu 8.

III. Ua fa'amalamalamaina fa'aopoopo.

1. O Iesu ma Āna lauga.

Sa tu'uina atu e Iesu o Āna lauga i a'oa'oga faigofie lava, i mea e masani ai tagata i aso ta'itasi, ma mea e tutupu i ia nu'u sa Ia nofo ai. Sa masani lelei o Ia ma ia matā'upu sa tautala i ai, ma e le'i fa'aaogāina fo'i e Ia o se "pepa galue;" peita'i, sa Ia fa'aaogāina lava le Tusi Pa'ia, pe a lauga i totonu o le sunako. O Ia o le Faiā'oga po o le Failauga mai le lagi.

E mafuli Āna tautalaga i mea po o matā'upu fa'ale-agaga, o matā'upu ia o le Malō o le Atua. E fa'apenā fo'i ma Lana 'au ulua'i failauga, o ē na latou fulifaōina le lalolagi i a latou lauga. Ia fa'apenā fo'i le 'au failauga a le Atua i ōna pō nei, ona ia latou ta'u ma le malosi o le mana mai le Agaga Pa'ia e mafai ai ona tosina tagata i le Ali'i.

2. E fa'aaogāina o mata'inumera fa'a-Roma ma le fa'a-Arapi, atoa ma mata'itusi i vaega o se lauga.

Ia manatua o le lauga e i ai vaega ua vaevae i ai le matā'upu o le lauga. O ia la vaega ua ūlu tala i fuainumera fa'a-Roma i ona vaega tāua po o le mamafa fo'i. E fa'aaogāina lava fuainumera fa'a-Arapi i vaega aupito i ai, po o le fa'aaogāina fo'i o mata'itusi i vaega laiti o le matā'upu.

O LE LAUGA Sauniuniga ma le su'esu'ega

I. O se fa'amalamalamaga.

0 le ā le lauga? 0 le ta'utinoga matagofie e 'avea ma tali ua saunia e se tasi faife'au ta'uta'ua e fa'apea: "*0 le Lauga o se vaega lea o le 'Upu Moni fa'alelagi, ua saunia ma filifilia, e tu'uina atu i lalo ifo o le ta'ita'iga malosi o le Agaga Pa'ia, ma fa'afeso'ota'i atu i mana'oga o tagata.*" E lē o se tautalaga lea na si'itia mai i se lauga a se failauga ta'uta'ua, e lē o se manatu fo'i lea na fa'atauina mai, ma ua teu e fa'atauina atu e le failauga, o lē ua lē iloa mai ia te ia le fa'aaliga mai luga o lona vala'auina. Peita'i, o se fe'au lava lea na maua sa'o mai lava i Lē e pogai mai ai o 'Upu Moni fa'a lugā, e ala mai lea i le filemū ma le matagofie e le Agaga Pa'ia i le mafaufau ma le loto. Ma ia tu'uina atu i le ala e mafai ai ona fetui lelei ma le mana'oga o lē o lo'o folafolaina atu i ai.

E fa'amaoni lava afai o le ala tonu lea e maua mai ai e le failauga o le matā'upu o lana lauga, ma o le Pogai lava e maua mai ai, o le a fa'apea ona tu'uina atu i le gagana faigofie ma le manino. 0 le a fa'atasi atu i ai ma le malosi lē ma-fa'amatalaina, ma ofi atu ai i tala atu o mata ma taliga, e ūlu atu ai i avanoa aupito i loloto o le loto, o le sini lava lenā o le lauga moni. Peita'i, ua mana'omia e le tagata ua fa'aaogāina e le Atua e 'avea ma 'ave fe'au o le 'Upu Moni, ina ia taumafai e su'esu'e ma ia 'avea o ia o lē ua fa'amaonia e le Atua, "*O le fai galuega e leai se mea e mā ai, na te vaevaetonuina le 'Upu Moni.*"

E ao ona lava le taimi e tu'uina atu i le **tatalo, faitau** ma le **su'esu'e**, auā o le olaga tataua lenā ia ola ai le failauga i aso uma lava. 0 le fa'atulagaina lelei o le taimi mo le su'esu'e, ia tusagalemū i le minute e tasi o le lauga, ia lē itiiti ifo i le tolu sefulu minute e fa'aaogāina i le su'esu'ega ma le sauniuniga.

II. O le a'ano o le lauga.

1. 0 itu tetele e tataua o na aofia ai i le lauga.

E ao ona ia manatua lenei itū tāua, o le lauga saunia mae'a lelei e tataua ona aofia i ai vaega tetele e tolu, lea e toe fa'amanatuina: a). Fa'atomuaga; b). Tino; ma c). Fa'ai'uga. 0 le va'ava'a lava lenei e fafau aga'i i ai le lauga atoa. E mana'omia e le lauga o se ta'otoga fa'apenā, e pei ona mana'omia e le tino le 'auivi. 0 le taofi lenei o failauga o ē sa ta'uta'ua i tupulaga ua mavae, o le laugaina o se lauga ua aunoa ma se āta (va'ava'a) ua tusa lelei lava ma se fale ua fauina e aunoa ma se āta ua fa'ata'atiaina.

2. Fa'amatalaga o vaega e tolu pei ona mua'i ta'ua.

- a. Ia muamua ona maua le *autū* e fa'atatau i ai le matā'upu o le lauga. O na e manatu loa lea i se tala fetau lelei o le Tusi Pa'ia, e aogā e fa'amalamalama a'i lea autū po o le matā'upu fa'avae o lau lauga. E mafai fo'i ona e filifilia o se molimau mai le Tusi Pa'ia e 'avea ma "Matua" o le lauga. O le vaega lea e ta'ua o le **fa'atomuaga**, o ulua'i manatu lava ia, pei o se potu muamua o le fale mata'aga tele o le a e 'aveina i ai le fa'apotopotoga e maimoa ai. E pu'upu'u lava lenei vaega, a ia matagofie ma ia logo leleia.
- b. O le **tino** e soso'o ai. O le vaega lenā e mamafa i ai le tautalaga, ona **o a'oa'oga** e fa'alautele ai le *autū* po o le *matua*. E i ai lava i le failauga e tusa ma lona lagona le aofa'i o vaega e aofia i lea vaega. Ia aga'i ina mamafa le a'oa'oga, a o tau lata atu i le fa'ai'uga o le matā'upu.

Tala si'i? E leai se tulafono e fa'atatau i le vaega o le lauga e te mana'omia e si'itia ai o se tala e fa'amalamalama ai le a'ano o le mea lea e te mana'o i ai, ina ia malamalama i ai le 'au fa'afofoga. Manatua le itū lenei: *Ia taumamāo lava le lauga ma ni tala e lē moni (fiction), tala na e fa'alogo ai mai se tasi (hearsay), tala fa'a-fagogo e lē i ai ni uiga tāua (legends or myths).* A e lelei tele pe a si'itia mai tala o le Tusi Pa'ia, auā o le a'oa'oga lea mai mea na tutupu i tagata ma o latou olaga. *O le tino la na te fa'amaonia atili le autū po o le matua.*

3. O le **ōlega**.

- i. O le vaega **fa'ai'u** lenā o le lauga. E tāua tele lava lea o na o le itū lenei, o le vaega lea e ui mai ai le **ōlega** a le failauga, e fa'atatau i le mea e mana'o i ai o ia i na ia faia e tagata. E sui ai fo'i le leo o le failauga i le vaega lea, ma e pu'upu'u lava. "Aua ne'i fefo'ifo'ia'i i lenei vaega, ona ua lelei isi vaega e lua ua mavae o le lauga."
- ii. O le autū e fa'atatau i ai. Ia tofu lava le lauga ma le autū e fa'atatau i ai. Ia manatua lava *ia totonugalemū lava ia Keriso na fa'asatauroina*, ma ia teu pea i le loto o 'upu fa'atonu nei: *0 ē folafola le fe'au mulimuli o le alofa tunoa, e ao lava ona tau'aveina pea i o latou mafaufau, ia fa' aeaina pea i luga Keriso e 'avea o le sulufa'iga o tagata agasala.*

O nisi ua latou manatu e lē o se mea mana'omia le folafola atu o le salamō ma le talitonu, ona ua latou taofi o tagata ia e lauga atu i ai, ua masani lelei ma le tala lelei. Ia e lauga pea 'oe e tusa i lau sauniuniga mai le Agaga o le Atua. E lelei lava matā'upu uma o A'oa'oga o le Tusi Pa'ia, e mafai ai ona va'aia o le fa'asologa o le fa'atuatuāga po o matā'upu e aofia ai i le 'Upu Moni, i le feso'ota'i atu o lē tasi i lē tasi, ma fepe'ita'i fa'atasi e 'avea o se mea atoa e tasi.

III. Manatu fa'aopoopo.

1. Puipui atu i le tulaga e lelei ai.

Ia fa'ata'atia e le failauga nei fesili i ona luma, a o i ai o ia i le sauniuniga mo le lauga. O le ā le mea e mana'o i ai le Atua ina ia faia e tagata i lo'u laugaina o lenei lauga? O fea e mana'omia e le lauga ina ia faia e le 'au fa'afofoga?

Pe afai e lagona lelei e le failauga le tali i lona loto, e tusa i nei fesili ua tula'i mai i ōna luma, o le a maua e ia le fa'atonutonuina o lana galuega. E 'avea lenā ma ala e fa'aleleia atili ai le tula'i atu o le failauga i luga o le fata pa'ia a le Atua, ma tōina mai ai na o malala ola e tu'uina atu e ola ai tagata o lo'o latou sa'ili e fia maua le ola. O nisi e mavae le aogā ma le tāua o le lauga ona ua tafao 'ese le failauga ma le ala sa'o e taunu'u atu ai i le mea o lo'o fa'amoemoe i ai.

Ia e iloa lelei lau matā'upu, ma ia e malamalama i ai, ma ia e tausisi pea i lau va'ava'a po o le ata.

2. Ia fauina fa'asolosolo e lelei ai.

E i ai ni lauga e taumafai le failauga e fa'ati'eti'e le faleāluga, a o le'i fa'atūina le malosi o le fale, o itū ia. *O le lauga saunia lelei, e la'a mai le tasi manatu i le tasi, ma e fa'asolosolo lelei lava pei o ni la'asaga o se fa'asitepu, se'ia o'o atu i le falealuga.* Ia aga'i atu ina mamafa le tautalaga a o aga'i atu i lona fa'ai'uga. E te lē taumafai e taulotoina ni 'upu o le ōlega, auā o le Agaga Pa'ia lava na te aumaia iā te 'oe 'upu fetau lelei mo le vaega fa'ai'u o lau lauga.

3. Ia pu'upu'u le lauga, a ia logo leleia.

Ia aofia lau ata i se taimi atofaina. Ia 'aua ne'i silia i le 40 minute, a e lelei pe a tusagalemū i le 'afa itulā. *'Aua ne'i tafao i le vao loloto, ne'i fesēa'i ma lē iloa ai.*

O LE FAIGA O LE LAUGA
O La'asaga e aofia i ai

I. La'asaga mo le fa'avaeina.

1. Ia tatalo ma le loto atoa i le Atua e tusa ma lau su'esu'ega i le Afioga a le Atua, tatala le fale teu 'oa o le Atua, ma ia e tō mai ai o se fe'au mo i latou o le a e lauga atu i ai.
2. Manatunatu i se matā'upu fa'avae lelei po o se autū o le lauga po o le Matua o le a fa'aauau i ai lau tautalaga. A maua ona e fa'atulagaina loa lea o se faitauga po o le Tusi faitau o lau lauga. Ia filifili mai se tala fetui lelei ma le autū, i na ia faigofie ona malamalama le matā'upu o le a e lauga atu ai.
3. Fai e 'oe fesili nei:
 - a. O ai e ōna le 'upu lea ua 'avea ma Matua? O ai e fai fa'atatau i ai?
 - b. Na mafua i se ā lea 'upu? O le ā le agaga na i ai i lea tagata i lea taimi?
 - c. O le ā le aogā i le 'au fa'alologologo o lea matā'upu o le a tautalagia?
 - d. E mata ea e tosina loto o le 'au fa'afofoga i le Atua i lo'u tu'uina atu o lenei lauga?
E aogā tele ia fesili i lau su'esu'ega o lo'o feagai ai. Ia e malamalama lelei i lea a'oa'oga o le a e tu'uina atu mo lea sauniga.
4. **"Ia e iloa ona vaevae le upu moni."** O se fa'aa'oa'oga mo lau su'esu'ega: *Matā'upu fa'avae, po o le autū, po o le Matua:* "O le olaga salamō e fiafia ai le lagi."
 - a. Ia avea ma Matua le *Luka 15:10*, "Ou te fai atu ia te outou, ua fa'apea le olioli i luma o agelu a le Atua, ona o le tagata agasala e to'atasi ua salamō."
 - b. O tusi sa e faitau ma su'esu'e i ai o le *Luka 15:1-10* ma le *Luka 19:1-10*.
5. O 'upu e fa'atomua ai le lauga: To'atele tagata Kerisiano o lo'o tau fesili i lenei fesili e fa'apea, "O le ā le matā'upu po o le la'asaga e mafai e le tagata agasala ona tatalaina ai le faitoto'a o le lagi?" Tele fo'i tali lelei ua saunia e tagata mo lea lava fesili, ma e ese'ese lava, fai mai nisi ia to'aga i le lotu ma fa'amaoni i ai, ma o lena e te maua ai le malō o le Atua. A e fai mai nisi ia fa'atuatua i le Ali'i, ma faia le amio lelei, o lenā le 'auala e te sao atu ai i Lona Malō.

II. Fa'amalamalama a'oa'oga o le tino o le lauga.

1. A'oa'oga I: O le tala iā Sakaio.

- a. O ai lenei tagata? O ia o le telona, le tagata ao lafoga mo le malō o Roma, sa ta'ua o le tagata agasala, ona e fa'asili e ia le lafoga e maua ai lona tamao'aiga.
- b. Le mafua'aga o lona mana'o: Ai na ia fa'alogo i le tala i le liuga ua o'o iā Mataio le tasi telona, ona oso ai lea o le naunau o lona loto e fia fa'apei o Mataio. Na galue lemū le Agaga Pa'ia i lona loto, ma ina ua fa'alogo loa o ia o le a ui ane Iesu i Ieriko, o lea sa fia va'ai ai o ia i fofoga o Iesu. *Ia fa'amamafa itu nei:- le loto naunau ma le fia va'ai iā Iesu.*
- c. Na a'e i luga o le la'au, ona o ia o le tagata pu'upu'u. E leai se mea e faigata i le tagata ua naunau lona loto i se mea e fia maua. O le ā le mea sa fia maua e Sakaio? E fia maua lona Ali'i Fa'aola o Iesu. E le'i fa'atali fo'i se'ia loto atu le to'alua i lea la'asaga ua naunau i ai, e leai lava. Na alu loa lava ma a'e i luga o le la'au i na ia taunu'u lona fa'amoemoega. Ina ua o'o tonu mai Iesu i lalo o le la'au, sa tū loa o Ia ma tepa a'e ona fofoga i luga. Sa silafia lelei lava e Ia le igoa o le tagata lea e i luga o le la'au, o lea sa vala'au loa e Ia le igoa o Sakaio. Fa'amamafa iinei le manatu lea, *E iloa lelei lava e Iesu 'oe, ma lou igoa, le mana'oga o lo'o iā te 'oe, e pei lava o Sakaio.*

O 'upu o lea vala'au a Iesu, "Sakaio e, ia e vave ifoifo ia i lalo, auā e tatau ona 'ou nofo i lou fale i le aso nei." Se vala'au inā logo lelei iā Sakaio. Fa'apefea ona tatou iloa ua maua le mea sa mana'o i ai le loto o Sakaio? (Matau le soāfuai'upu lea, "E tatau ona ou nofo i lou fale i le aso nei"). Ia manatua le galuega a Iesu i lenei lalolagi o lo'o ta'ua i le fuai'upu e **10**, "**Auā ua sau le Atali'i o le tagata e sa'ili ma fa'aola i lē ua lē iloa**" (**Luka 19:10**). Sa i ai lenei tagata i le tulaga o le lē iloa, a ua sau Iesu e sa'ili iā te ia. (Si'itia le **Fa'aal. 3:20** o loo ta'u mai ai le sa'ili mai o Iesu ina ia tatala atu o tatou loto, ina ia ulufale mai, ma fai Lana galuega o le fa'aolataga. Ua tatala nei le loto o Sakaio).

2. Aoaoga II. O le la'asaga na soso'o ai na faia e Sakaio, *F. 6*, "ona vave alu ifo ai lea o ia, ua tali mai ia te Ia ma le fiafia." (Fa'amamafa le itū lenei, na a'e i luga o le la'au ma le agasala, a e alu ifo i lalo o le la'au ua fa'aolaina, ina ua talia o Iesu). **O le ta'uamionuina i le alofa o le Atua, o le mea foa'i fua mai lea a le Atua e ala iā Iesu Keriso.**
3. Aoaoga III. I totonu o le aiga o Sakaio, ma le ta'utinoga a Iesu, atoa ma le fa'aaliga a Sakaio. Ta'utinoga a Iesu i le aiga o Sakaio, "Ua o'o mai le fa'aolataga i le aiga nei i le asō." Se ta'utinoga inā matagofie! Ni 'upu inā logo leleia! E i ai le fa'avae o lea tuleiga a Iesu. Na muamua lava ona tatala atu Sakaio i upu nei, ma ua 'avea lava lea ma fa'aaliga o lona taliaina o Iesu, "Fa'auta le Ali'i e, o le a 'ou vaeluaina atu a'u mea i ē matitiva; afai e i ai se

tasi ua tigā i lo'u tu'ua'i ane, 'ou te tau'i atu ai e ta'ifā." *O se va'aiga lea e ofo ai, ma se liuga e fiafia ai le 'au agelu a le Atua i le lagi.*

4. O le olaga salamō ma ōna fua.

Sa matuā ofo tagata o lenā a'ai, ina ua fa'apea ona faia e lenei telona iā te i latou. Afai o le tane sa i ai se totogi fa'asili na faia i ai e lenei ali'i o Sakaio i se talā e tasi, a ua alu atu nei ma toe fa'afo'i atu i ai lea talā e tasi, ma le isi fā talā e fa'aopoopo i ai, o se mea lava e tete'i ai tagata ona o se mea fa'apea ua mafai ona faia, talu ai le galuega a le Ali'i Fa'aola agalelei. E lē gata ai i lea, a e sa tufa atu ni ana mea mo ē matitiva.

5. O le fa'aiuga.

E talia e Iesu le tagata e alu atu iā te Ia ma lona olaga agasala. “*Aua e te manatu fua 'oe i nisi,*” e ui ina sa muimui tagata ina ua maliu atu Iesu i le fale o Sakaio. O le itu sili lava o le talia lea o Iesu. Ia naunau o tatou loto iā te Ia ma tatou sa'ili atu iā te Ia e pei o lenei tagata. Ia fa'aalia lea fa'amoemoega, ina ua **tu'u atu i lo tatou Fa'aola na te faia le galuega tatou te lē mafai ona fai, o le salamō lea fa'ale-Atua i o tatou olaga.**

O ITŪ'AIGA O LAUGA, MA ĀLA E GALUEA'IINA AI

E na o le tolu o itu'aiga o Lauga, ma e tolu fo'i fa'atulagaga o ia itu'aiga o lauga:

1). EXTEMPORE; 2). MANUSCRIPT; 3). MEMORITER.

Ua fa'amatalaina nei matā'upu i le gagana Samoa ona e leai ni 'upu fetau lelei i la tatou gagana. E tofu ma lona fa'amatalaga, o lea fo'i ua tatau ai ona saunia le failauga na te fa'aaogāina le faiga sili. O nisi fo'i 'auala e uia e failauga i a latou lauga, e ao ona aūga atu i se tasi o nei itu'aiga.

I. O le lauga **Extempore**.

E leai se faiga o lauga e sili a'e i lo lenei, ma e tatau lava ona taasisi atu i ai i na ia 'ausia.

1. O itu nei e tatau ai:

- a. E ta'ua o le faiga aupito i sili.
- b. E i ai la'asaga o mea e tutupu ua mafua ai.
- c. E fa'asaoina ai le taimi mo le su'esu'e.

2. Fa'amatalaga.

- a. O le itu'aiga lauga lenei sa fa'aaogāina e Iesu ma ulua'i failauga o le tala lelei. A e ao ona tatou fa'aeteete i lenei faiga o lauga, ona ua to'atele ua latou avatu le asini a Pala'amo i le pulela'a, a o le asini na te lē o lagonaina se mea. A lē lolōto la tatou va'ai ma lo tatou iloa o lenei 'upu "*Extempore*" ma lona uiga, o le a lē maua le aogā sili o lenei 'upu. "*O le maua o 'upu tatau i le taimi e lauga atu ai, o le fa'atulagaina o le matā'upu i le tulaga aupito i sili, i ona fa'atatauga uma e lelei ai, e ui lava ina e le'i mua'i fa'atulagaina fa'apea; peita'i, o le gagana e fanaua i le itūaso, fanaua lava i le taimi o le lauga, o le lauga Extempore lenā.*"

O le failauga ua pulea e le agaga lea, pei ona aofia ai i lenei faiga o lauga, ua tū atu ma sasa'a atu mai lona loto le fe'au o le taimi i luma o le fa'apotopotoga, i le lafo atu o 'upu e pei o le tafe mālie atu o se suāvai manino o le si'itia lea i luga o le loto. Ia manatua fo'i e maua ai e le Agaga Pa'ia o Lana vaega i lea lauga.

- b. A vala'auina i se sauniga e le'i mafaufauina, po o le lagona o le fia tautala atu i se sauniga, e mafai lava e lenei ala ona fa'atula'i atu o le failauga e lauga atu i le tulaga o le saunia lelei lava. E tele lava avanoa aogā e lē maua e le failauga o lē e lē mafai ona tula'i atu i le pulela'a e aunoa ma le lauga ua tusia. Na mafai e lenei itu'aiga o lauga ona fa'atula'i atu o se

failauga talavou, o lē sa fesoasoani iā Supaisone i lana lauga na le'i mae'a. Ina ua o'o atu le lauga a le toea'ina i se vaega, a e lagona loa ua vaivai, ona ua matua; sa tula'i atu loa le failauga talavou, ma ua soso'o lelei lava le lauga, pei lava o ia na amataina. Ia manatua, o le Agaga Pa'ia lava lea e tasi o lo'o i ai i nei failauga e to'alua.

- c. E tele le taimi o le failauga e aogā i le fa'asaga atu i le su'esu'e ma le faitau atoa ma le tatalo, auā ua itiiti le tusitusi. I le tele o āna fe'au i aso ta'itasi, o le a ia lagonaina pea lava pea le mana'o e fa'asaoina le taimi e tu'uina atu i aso ta'itasi, i le su'esu'e mo ana lauga.
3. O ala e fesoasoani ai i lenei itu'aiga o lauga:
 - a. Ia fa'ata'atia ma ia tusia se va'ava'a ma ni 'upu e fa'atomua ai vaega ese'ese ua aofia ai, a e maise o ni manatu tāua, ma ni mau e fia fa'aaogāina.
 - b. Ia alu atu le failauga ma 'upu faigofie. Ia fa'aa'oa'o apa'au ona lele i mea mauualalalo, ona fa'ato'ā sa'ili ai lea e lele i mea mauualuluga, o le vā nimonimo o lanu matagofie.
 - c. O 'upu e sesē ai le gagana — ia alu pea, ma ia salu fa'atasi ma mafaufauga.
 - d. Ia maua le agaga ua si'itia i luga. Ia tatalo ma tatala punavai o le loto. Fa'atoga atu i le Atua, ona Ia fa'atumuina lea o avanoa uma lava.

II. Ō le lauga e ta'ua o le **Manuscript**.

1. O se fa'amalamalamaga.

O le a lea ituaiga o lauga? O le lauga lea ua tusia uma lava, e amata mai lava i le ulua'i 'upu e lafo atu e o'o atu i le amene fa'ai'u. Se'i manatua lenei itū, o le lauga a se tasi i luma o se fa'apopotoga i se lauga ua tusia uma lava, e lē o se lauga lenā mea. E 'ese le faitau tusi, 'ese fo'i le failauga.
2. O itū e mana'omia ai e nisi lenei itu'aiga o lauga.
 - a. O le tusia o le lauga, na te fa'asa'oina ma fa'aleleia le lauga. A faitau lava e le failauga o lana lauga a o tula'i o ia, e aunoa lava o ia ma se uiga e fa'amamafaina pe fa'amalosia ai o 'upu tāua o le matā'upu. O lenei faiga e sili atu lona leaga i lo le lauga "extempore" a o le'i su'esu'e i ai. E ui lava ina ua saunia ma tusia le lauga i lona ato'atoa, a e afai e tusia ma le fa'ata'alise, e ao fo'i la ona tu'uina atu ma le "faua."
 - b. O lenei ala na te tu'uina atu i le mafaufau, e ala atu lea i le va'ai o se fesoasoani i le taimi a o alu pea le lauga. E lē mafai ai lava ona pa'ū o se vaega o le lauga, a e na o le *fa'amanatu o mea ua tusia, ina ia solo lelei pea le alu atu o 'upu mai le va'ai ma le mafaufau*. O le peni na te tuleia le mafaufau, ma 'avea ma āla e fa'anenefu ai le mafaufau, se'ia iloga o le tagata failauga faitau lelei ona manumalō lea i lea galuega.

3. O itū e tete'e atu ai nisi i lenei faiga o lauga.
 - a. Ua leai se malamalamaga po o se manino i le uiga moni o le lauga. Ua taofia uma lava lea e le tulafono a le peni.
 - b. E leai se galuega tele a le mafaufau i luga o le pulela'a, auā o mata ma le leo ua faia le galuega uma lava.
 - c. Ua fusia ai le failauga i le tepa atu pea i lenei lauga tusia, ma ua leai o se avanoa e tepa atu ai i le fa'apotopotoga. E lē maua ai fo'i e le Agaga Pa'ia i luga o le fata o se avanoa e tu'uina atu ai o 'upu fetau lelei, auā ua tusia uma lava le lauga. E i'u atu ai lava ina lē maua le mana i le galuega. E leai se mea e tasi na te mafai ona feagai ai ma faigatā o lenei itu'aiga o lauga ma manumalō ai, se'ia vaganā ua mū le loto, ma ua mumū i le naunau ia lavea'iina o agaga mo le Atua.

III. O le lauga e ta'ua o le **Memoriter**.

1. Fa'amatalaga o lenei itu'aiga lauga.
O le itu'aiga lauga lenei e masani ai tagata anamua, ma sa manuia ai la latou galuega i lea āla, ai ona o le malolosi o o latou mafaufau. O le ā lea itu'aiga o lauga? O le lauga lea e mua'i tusia uma lava, ona a'oa'o tauloto atoa ai lava lea.
2. O itu e ta'uleleia ai lenei itu'aiga o lauga:
 - a. E va'ai ma tautala sa'o atu lava i le fa'apotopotoga.
 - b. O le gagana e fai ai le lauga ua mae'a ona saunia lelei ma taulotoina.
 - c. E tu'uina atu ato'atoa lava e le failauga o ia lava i le gaoioiga o le lauga atu, o le tula'i atu ma le onomea lava, ma fa'amamafa atu lava o itu e manatu o ia e tāua i le lauga. E leai se toe taumafai o le mafaufau e sa'ilia nisi manatu, na ona fa'amanatu o mea ua uma ona tu'uina i ai.
3. O itu e lē lelei ai lenei itu'aiga o lauga.
 - a. E tele le taimi e taumafai ai le mafaufau e taulotoina le matā'upu, ma e i'u lava ina lē manumalō ai i lea taumafaiga.
 - b. O le ala e alu atu ai le fe'au, e fa'aalia lea i le va'ai, e le va'ai i le fa'apotopotoga i lona ato'atoa, a e tepa i le mea e tasi. E mafai ona 'avea le gaoioi ma fa'alavelave e tupu ai le galo o se vaega o le matā'upu o lo'o tu'uina atu.
 - c. O le fefe lea i le vaega e pa'ū atu ai i faigatā lē ma-iloa, lē ma-va'aia. O 'upu e foliga mai e sau mai iā te i latou lava. O le galuega tele o le manatunatu i 'upu, po o le mata'u i le galo o 'upu, e fa'alē-aogāina ai le lauga, e fa'aleagaina ai ma le failauga. O nei fa'alavelave e atili fa'amaonia ai o le lauga "Extempore" e sili lea i le faiga o lauga mo le galuega sili. O le malosi mai tua e tu'uina mai e le 'au fa'afofoga e feso'ota'i mai i le failauga, e tu'uina mai i le tatalo ma le fa'atoga i le

taimi filemū o le su'esu'e, e 'avea ai lava le "Extempore" o le ala aupito i sili ona lelei, mana'omia, a e maise ai lava o failauga o le fe'au mulimuli.

IV. Olega mo le vasega o failauga.

Le 'au failauga e, ia finafinau e sa'ili mo le itu'aiga sa fa'aaogāina e Iesu, ona ua iā te 'oe le lagona, o Ia ua na 'auina 'oe e te folafola le 'upu o le ōla, ma tosina agaga i le satauro.

O LAUGA ESE'ESE MA LE FA'ATULAGAINA

E i ai lava igoa ese'ese o lauga o le Tusi Pa'ia e fa'atatau i le fa'atulagaina i o latou su'esu'ega. Ma ua ta'itasi la ia lauga ma le fa'amatalaga atoa ma le su'esu'ega e iloa ai le ese'esega. E fa'aauau fa'amalamalamaga ma fa'aa'oa'oga i matā'upu o mulimuli mai.

I. EXPOSITORY SERMON (“Lauga Eseposesionē”).

O le faiga lenēi o lauga ua ta'atia lelei mai lona uiga manino lelei, ona ua lava ato'atoa lona su'esu'ega; i le fa'asolosolo ma le malamalama i se matā'upu e fa'atatau i lona fa'avac po o lona autū. E au'iliili lelei ma e mae'a lelei le fa'amatalaga e le failauga, o lē ua 'avea ma sini o ana lauga le “*fafagaina o le lafu mamoe.*”

II. Su'esu'ega mai fa'aa'oa'oga.

Faitau ma manatunatu i lenēi **Fa'aa'oa'oga I (Lauga Eseposesionē).**

1. Autū o le lauga:

"O le tagata sa'ili na fa'aolaina, ina ua fo'i i lona aiga."

2. Faitauga mai le Tusi Pa'ia:

Galu. 8:26-40.

3. 'Upu e fa'atomua ai:

E ese'ese ala e fa'aolaina ai e le Atua le tagata o lo'o sa'ili ma lona loto i le fia maua o le fa'aolataga. I lenēi sauniga o le a tatou silasila manino ai lava i la'asaga tāua ua aofia ai i le fa'aolaina o le tagata Aitiōpe, le eunuka, lē na malaga i le nu'u mamao e sa'ili i le Atua moni.

4. Su'esu'ega mai le a'ano.

a. Mai le tulaga o lo'o i ai Filipino: O la'asaga e tupu mai i le fa'amaoni e molimau atu:

i. E ao ona gaua'i o ia i le ta'ita'iga a le Agaga Pa'ia (*F. 26 - 30*).

ii. Na alu loa i ai i lea fa'asinoga ma le fa'autauta lava (*F.30*).

iii. E tatau iā te ia ona fa'aaogāina le Tusi Pa'ia (*F. 32 – 35*).

iv. E tatau ona ia tu'uina atu Iesu (*F. 35*).

v. E tatau ona ia faia le galuega ia o'o i lona i'uga (*F. 37, 38*).

b. Mai le tulaga o loo i ai le Aitiōpe: O la'asaga e aga'i atu i le fa'aolataga.

i. E tatau ona tatala lona loto i le 'Upu Moni (*F.28, 31*).

ii. Ia i ai le loto malamalama iā te ia (*F. 30*).

iii. E ao iā te ia ona talitonu (*F. 37*).

- iv. E tatau iā te ia ona usiusita'i (F. 38).
- c. Mai le tulaga o lo'o i ai le Agaga Pa'ia: 0 ta'ita'iga a le Agaga Pa'ia.
 - i. Na ta'ita'iina atu e Ia Filipino i le mea e alu i ai (F.26, 29).
 - ii. Na ta'ita'iina atu Filipino i se tagata (F. 29, 30).
 - iii. Na ta'ita'iina Filipino i le molimau mana'omia mai le Tusi Pa'ia (F. 35).
 - iv. Na ta'ita'iina Filipino i se i'uga e fiafia ai (F. 39).
- d. Mai le tulaga o lē o lo'o sa'ili mo le fa'aolataga: E fesoasoani atu ai i le ala o le fa'aolataga.
 - i. 0 le Agaga Pa'ia (F. 29).
 - ii. 0 le Afioga pa'ia (F. 28 – 33).
 - iii. 0 lē e lavea'i agaga (F. 30, 35, 37, 38).
- 5. Fa'aiuga:

Na i'u lava ina maua e lenei tagata le fa'aolataga. I lona fo'i atu i lona aiga, ina ua sa'ili atu o ia ma lona loto atoa e ala lea i lona faitau i le Afioga a le Atua, o le ā le tusi sa ia faitau i ai? 0 le tala lea iā Iesu ma Lona alofa mai, ma Lona maliu i le satauro ona o i tatou.

Manatunatu i le **Fa'aa'oa'oga II (Lauga Eseposesione).**

- 1. Autū:

0 le la'asaga o le fanau fa'alua e mana'omia ina ia maua e le tagata o lo'o sauni mo le malō o le Atua.
- 2. Faitauga mai le Afioga pa'ia ma le Matua:

Ioa. 3:3. “Ua tali atu Iesu, ua fa'apea atu ia te ia, ‘E moni, e moni, ou te fai atu ia te oe, a lē toe fanau le tagata, e lē mafai ona iloa e ia le malo o le Atua.’”
- 3. 0 ‘upu e amata ai:

I le olaga fa'ale-tapua'iga o le tagata i lenei lalolagi, e ao ona fanau fa'alua le tagata. A o le taofi o tagata o lenei lalolagi, e na o le fa'a tasi ona fanau ai o le tagata, le manatu lea sa fenumia'i iā Nikotemo. O lea na ia fesili ai iā Iesu, pe “fa'apefea ona toe ofi o le tagata i le manava o lona tinā, ina ia toe fanau mai ai o ia?”
- 4. Tino o le lauga.
 - a. Vaega I o le a'oa'oga

E tutusa uma lava tagata i le fanau muamua mai.

 - i 0 le fanau mai o le tagata i lona tinā, o le fanau muamua lenā. Molimau i ai *Iopu. 14:1*. E tutusa ai uma lava tagata soifua i lea la'asaga. O le olaga lea e tumu i puapuagā ma le atuatuva'e, o le maliu ma le oti.

- ii. Faamatala nisi o fa'afitauli e feagai ai ma tatou uma i le olaga nei, e i ai fa'aosoosoga.
- b. Vaega II o le a'oa'oga.
 - 0 le ā lea la'asaga o le "toe fanau?"
 - i. E ta'ua o le "toe foafoaina," (re-creation), o le fanau fa'ale-agaga lea. E lē iloa le taimi e o'o ai le tagata i lea la'asaga (*Sala. 51:10; Ioa. 1:13; 3:3, 5*).
 - ii. O le toe tū mai i le oti fa'ale-agaga (*Efe. 2:1; Ioa. 3:14*).
 - iii. Liuga lea e faia i totonu o le loto ma le olaga (*Roma 12:2; Kolo. 1:13*).
 - iv. E tu'uina mai e le Atua o le loto fou i lea tagata (*Esek. 36:26*).
 - v. Maua i le olaga o se fesuia'iga e va'aia e fai lea ma molimau (*I Pete. 1:4*).
- c. Vaega III o le a'oa'oga.
 - O le tatau ai o na maua o le fanaufouina.
 - i. O se la'asaga tatau ma le mana'omia le feso'ota'i ma le Atua (*II Kori. 6:14 – 18*).
 - ii. Lagona i le loto le tāua o folafolaga a le Atua (*Roma 8:17*).
 - iii. Ia ola i se olaga pa'ia (*II Pete. 1:4*), ia mua'i maua le uiga ma le natura fou, o na ola ai lea i le olaga fanaufouina.
 - iv. Ia saunia e ulufale i le fa'atasiga ma le ekalesia (*Efe. 3:15*).
- d. Vaega IV o le a'oa'oga.
 - O ala e galuea'iina ai le "toe fanau."
 - i. Galue le Agaga Pa'ia i lea galuega ua faia i le olaga (*Tito 3:5; Ioa. 3:6 – 9*).
 - ii. O le mea faigaluega e galuea'iina ai, o le Afioga lea a le Atua (*I Pete. 1:2*).
- e. Vaega V o le a'oa'oga.
 - Fa'amaoniga o le fanaufouina.
 - i. Fa'atuatua (*I Ioa. 5:1*).
 - ii. Manumalō i le lalolagi (*I Ioa. 5:4*).
 - iii. Amiotonu i le olaga (*I Ioa. 5:18*).
 - iv. Alofa i le Atua (*I Ioa. 5:1, 2*).
 - v. Alofa atu i le 'au uso – feālofani (*I Ioa. 4:7, 20*).
- 5. Fa'ai'uga ma le olēga.

Po o ua 'ausia 'ea e lou olaga le fanau fa'alua? O le fesili aupito i tāua lea i le olaga taumafai o le Kerisiano. Afai ua fanaufouina lou olaga, e maua 'ea ma va'aia ai o fua o lea la'asaga i aso ta'itasi?

TEXTUAL SERMON
“Lauga Tekesituale”

I. O se fa'amatalaga i lenei itū'aiga lauga.

E tausisi atu lenei lauga i le vaevaeina o se mau e fa'atatau i le autū o lo'o tautalagia e lea matā'upu. E atili maua le malamalama pe a fa'amatalaina e nisi molimau fesoasoani i le mau autū.

II. Fa'aa'oa'oga **Textual Sermon (“Lauga Tekesituale”)**.

1. Autu o le lauga:

0 Iesu Keriso, o le Fa'aola o Ia o le tagata agasala.

2. Matua:

I Timo. 1:15. "0 le upu moni lenei, e tatau lava ona matuā talia, na maliu mai Keriso Iesu i le lalolagi, na te fa'aolaina o ē agasala; ua sili musa a'u nei iā i latou."

3. Upu fa'atomua:

0 se matā'upu silisili lea ua tatou maua i totonu o le Tusi Pa'ia, ua fa'aalia mai e lenei tagata ua lauiloa i totonu o le galuega o le fa'aolataga.

4. A'oa'oga mai le tino o le lauga. Fa'afofoga i itu nei.

a. 0 le fa'asilasilaga fa'alaua'itele: "*O le upu moni lenei....*"

i. 0 upu moni e faia ua tuuina mai i tagata faamaoni (*I Timo. 1:12*).

ii. E i ai uiga loloto o 'upu moni e tu'uina mai (*Tito 3:8*).

b. 0 le tulaga o lea fa'asilasilaga fa'alaua'itele, "*E tatau lava ona matuā talia....*"

i. E tatau ona fa'ailoa atu lea fa'asilasilaga i luma o ali'i maua luga, ma faipule (*Galu. 26:26-28; 24:24, 25*).

ii. Ia fa'ailoa atu fo'i i tagata lautele uma lava (*Galu. 2:5, 9-11*).

c. 0 le Tagata ia fa'ailoa atu, "*Keriso Iesu....*"

i. 0 Iesu o Ia lava o le Ālo fa'apelepeleina o le Atua (*Mare. 1:11*).

ii. 0 Iesu o le Alefa ma Omeka, o le Amataga ma le Gata'aga (*Fa'aali. 1:8*).

iii. 0 Ia o le Ali'i e ōna le mamalu uma lava (*I Kori. 2:8*).

d. 0 le nofoāga e tu'uina mai i ai lenei fa'asilasilaga, "*Na maliu mai i le lalolagi....*"

i. 0 Ia na maliu mai o se tagata lava (*Luka 2:7*).

ii. Na maliu mai i le lalolagi, ma o se tagata mativa lava (*2 Kori. 8:9*).

iii. Na maliu mai i le lalolagi i le fa'a'atoaga o tausaga (*Kala. 4:4*).

- e. O le autū sili o lea fa'asilasilaga, "*Na te fa'aolaina....*"
 - i. E fa'aola mai le tagata mai le agasala (*Mata. 1:21*).
 - ii. E faaola le tagata mai le loto fuatiaifo ua leaga (*Eperu 10;13*).
 - iii. E fa'aola le tagata mai le fa'asalaga e fa'avavau (*Luka 16:23*).
- f. O tagata e folafolaina i ai lenei fa'asilasilaga "*O ē agasala....*"
 - i. O ē agasala, e tauaso fa'ale-agaga i latou (*Efe. 4:4, 18*).
 - ii. O ē agasala, e nofo pologa i mea leaga ua latou faia (*Ioa. 8:3, 4*).
 - iii. O ē agasala, ua na o le leaga e mafaufau i ai e faia (*Faila. 9:3*).
- g. O lana ta'utinoga iā te ia lava e fa'atatau i le fa'asilasilaga fa'alaua'itele ua faia, "*Ua sili musa a'u nei.*"
 - i. E sili musa o ia, ona sa i ai o ia i sauāga na fa'ao'oina ai le oti iā Setefano (*Galu. 7:58; 8:1*).
 - ii. E sili musa o ia, auā sa ta'ita'i o ia i sauāga na fasiotia ai le 'au fa'atuatua (*Galu 8:3*).
 - iii. E sili musa o ia, ona o le uiga tumau o le agasala sa iā te ia (*Tito 3*).
- 5. Olega ma le fa'ai'uga.
 Ia talia i lou olaga lenei 'upu moni silisili ua folafolaina mai. Ia lagona i le loto le alofa tele o Keriso, ma ia gaua'i atu e faia lona finagalo.

TOPICAL SERMON “Lauga Topikale”

I. Fa'amatalaga o le uiga.

E lagolagoina lava le autū po o le matua i le fa'amatalaina auaua'i o nisi molimau fetau'i lelei mai le Tusi Pa'ia e fa'amaonia ai lea matā'upu o lo'o laugaina. A ia fa'aeteete i le fa'aaogāina o mau lē tala feagai ma le matā'upu, po o tala si'itia fo'i.

II. Fa'aa'oa'oga o le **Topical sermon** (“Lauga Topikale”).

1. Autū ma le matā'upu fa'avae:

0 le fa'amagaloga moni.

2. Faitauga mai le Matua:

I Ioa. 1:9. "A e afai tatou te fa'aali a tatou agasala, e fa'amaoni o ia, ma le amiotonu e faamagaloga ai a tatou agasala, ma faamama mai ia i tatou i amioletonu uma lava."

3. Su'esu'ega mai le A'ano o le lauga.

a. 0 le uiga o le fa'amagaloga.

i. 0 lona uiga ua fa'amamāina (*I Samu. 15:25*).

ii. 0 lona uiga ua 'ave 'eseina le solitulafono (*Sala. 103:12*).

b. 0 le tatau ai ona maua le fa'amagaloga.

i. Ua tatau ona maua le fa'amagaloga, auā ua agasala tagata uma (*Roma 3:23*).

ii. E lē mafai ona ulufale i le lagi, a o le'i fa'amagaloina (*Fa'aal. 21:27*).

c. E fa'aapefea ma e ala mai iā te ai le fa'amagaloga?

i. E mai le Atua le fa'amagaloga moni (*Tani. 9:9*).

ii. E ala mai iā Iesu Keriso le fa'amagaloga (*Mata. 9:6*).

iii. E ala mai i le toto o Keriso (*Kolo. 1:14*).

d. 0 le tagata na te maua le fa'amagaloga.

i. 0 i latou e fa'amaoni ona fa'aali atu a latou agasala (*Sala. 32:5*).

ii. 0 ē ua salamō mai a latou agasala (*Gal. 3:19*).

iii. 0 ē ua lafoa'i a latou agasala (*Isa. 55:7*).

e. 0 fea le nofoāga e maua ai le fa'amagaloga?

i. 0 le ma'i supa na fa'amagaloina lava i lona moega (*Mare. 2:1-5*).

ii. 0 le fafine mulilua na fa'amagaloina i le malumalu (*Ioa. 8:2, 10*).

iii. Na maua lava e le pagotā i le satauro (*Luka 23:42, 43*).

f. 0 le taimi e fa'amagaloina ai.

- i. Na o'o mai i tagata Tesalonia ina ua liliu i le Atua (*I Tesa. 1:9*).
 - ii. E o'o mai pe a gaua'i iā Keriso (*Gal. 10: 43*).
 - iii. E mafai lava ona o'o mai nei lava (*Isa. 1:18*).
- g. O le fua o le fa'amagaloina.
 - i. E ta'uamiotonuina ai i luma o le Atua (*Gal. 13:38, 39*).
 - ii. E lē toe manatua ai agasala tuai (*Eperu. 10:17*).
 - iii. Maua ai le fa'afouina o le olaga (*Roma 6:4*).
- 4. Olega ma le fa'ai'uga o le lauga.

Po o ua maua ea le fa'amagaloga moni a le Atua i lou olaga? E lē mafai e le tagata ona 'ausia le fa'amagaloga moni, se'ia vaganā ua tu'uina atu ato'atoa lava o ia iā Keriso, o lē ua 'avea ma āla e maua ai le fa'amagaloga i le olaga.

CONTRAST SERMON “Lauga Konatalasi”

I. Fa'amatalaga o le itū'aiga lauga.

O le itū e mamafa i ai le tautalaga a le failauga, o le ese'esega lea o se mea po o ni mea o lo'o fia fa'amalamalamaina. Ma e ao lava ona ma'oti lelei le fa'amalamalamaga o ia lava itū o lo'o āu'ili'ili ona fa'amatalaina. Ia manino lelei lava.

II. Fa'aa'oa'oga o le **Contrast sermon** (“Lauga Konatalasi”).

1. Autū o le lauga:

"O le ola ma le oti, po o le manuia po o le malaia."

2. Matua mai le tusi faitau:

Teut. 30:19.

3. Manatu e fa'atomua ai:

E na o le lua lava itū e fai fa'atatau i ai le filifiliga a le tagata, ma o le i'uga o lana filifiliga e fa'atatau i ai le itū e aga'i i ai lona olaga. O le itū a le Atua, o le ola lea ma le manuia; a o le oti ma le malaia o le i'uga lenā o le itū a Satani ma le agasala.

4. Su'esu'ega mai a'oa'oga.

a. E i ai le ese'esega o mea e i ai ia nofoāga.

i. O le oti ma seoli e i lalo nei (**Mata. 11:23**).

ii. E fa'amatalaina le lagi e fa'apea o lo'o i lugā (**Gal. 1:11**).

iii. O le lagi e fa'asino i le nofoāga i lugā (**Ioa. 6:38**).

b. E ese'ese lo la fa'amatalaga.

i. Fa'amatalaina seoli ma le oti o le lepa afi (**Fa'aal. 20:10**).

ii. O le lagi o le nofoāga lea o le malamalama e fa'avavau (**Fa'aal. 22:4, 5**).

iii. E matagofie lea nofoāga e ta'ua o le lagi (**Fa'aal. 22:1-3**).

c. E i ai le ese'esega o ē nonofo ai.

i. E nonofo ai i latou o ē na te'ena Iesu i seoli (**Ioa. 8:21, 24**).

ii. O le lagi e 'avea ma nofoāga o ē na talia Iesu (**Gal. 4:12**).

iii. E 'avea ma nofoāga o ē ua fa'amamāina i le toto o Keriso (**Fa'aal. 1:5**).

d. E ese'ese mea e manana'o i ai tagata e faia.

i. E manana'o i latou o ē i seoli ina ia lapata'iina isi (**Luka 16:27, 28**).

- ii. E manana'o o ē sao i le lagi e savavali i le malamalama (**Fa'aal. 21:23, 24**).
- iii. E fiafia e vivi'i i le Atua (**Fa'aal. 7:9-12**).
- e. E i ai le ese'esega i gaoioiga i mea e fai.
 - i. O seoli o le nofoāga e fa'ataugaina ai (**Fa'aal. 14:10**).
 - ii. O le lagi e lē toe i ai ni loimata e maligi ai (**Fa'aal. 21:4**).
 - iii. O le lagi o le nofoāga lea e au'auna atu ai i le fiafia (**Fa'aal. 22:3**).
- f. E i ai le ese'esega i le ala e ui atu ai.
 - i. O seoli e ui atu ai i latou o ē lē talitonu (**Fa'ata. 29:1**).
 - ii. O Keriso o le faitoto'a lea e ui atu ai i le lagi (**Ioa. 10:9**).
 - iii. O le lagi e ūlu atu i ai i latou e i ai le fa'atuatua pei o le tamaitiiti (**Mata. 18:3**).
- g. E i ai le ese'esega i le vā feagai ai ma le Ali'i o Iesu.
 - i. E tu'u ese'eseina o ē agasala mai le Ali'i Fa'aola (**Mata. 25:41, 46**).
 - ii. E fa'atasi ai le 'au pa'ia ma Iesu i le lagi (**I Tesa. 4:17**).
 - iii. E foliga ai le 'au pa'ia iā Iesu i le lagi (**I Ioa. 3:2**).
- 5. Fa'ai'uga ma le ōlega.

E tau gofie na'uā le lagi mo so'o se tasi e naunau ina ia fa'aolaina e lo tatou Ali'i o Iesu. E pu'upu'u lava si taimi tatou te onosa'i ai i mea tigā, a e mamafa le tau i ua saunia mo i tatou pe a i'u le tausinioga ma ua maua le manumalō iā te Ia. *O le tau i, o le tatou maua lea o le malōlōga e fa'avavau.*

TYPICAL SERMON “Lauga Tipikale”

I. Fa'amalamalamaga.

O lenei lauga e fai lana a'oa'oga e fa'atatau i se mea faiata o le Tusi Pa'ia. O se fa'atusa e fetau lelei ma le a'oa'oga. E matagofie tele lenei faiga lauga pe a malamalama lelei le matā'upu.

II. Fa'aa'oa'oga o le **Typical sermon** (“Lauga Tipikale”).

1. Autū ma le fa'avae.

O le va'a o le fa'aolataga iā Noa, a o Keriso o le fa'aolataga iā i tatou.

2. Faitauga mai le Tusi Pa'ia.

Kene. 6:11 – 14; 7:1 – 7; 8:4 – 18.

3. A'oa'oga ma su'esu'ega mai le tino.

a. Mana'omia le va'a ona o le agasala (**Kene. 6:11-13**);

Mana'omia Keriso ona o le agasala.

i. Mana'omia Keriso, auā ua agasala le tagata (**Faila. 7:20**).

ii. Mana'omia Keriso, auā ua sē 'ese le tagata ma le ala (**Isa. 53:6**).

iii. Mana'omia Keriso, auā ua fesāga'i le tagata ma le oti (**Esek. 18:4**).

b. Na fuafuaina e le Atua le va'a (**Kene. 6:14**); o le soifuāga o Keriso na fuafuaina lava e le Atua.

i. Na fuafuaina e le Atua le nuu e fanau mai ai (**Mika 5:2**).

ii. Na fuafuaina e le Atua Lona maliu (**Fa'aal. 13:8**).

iii. Na fuafuaina e le Atua Lona toe tū mai (**Gal. 10:40**).

c. E na o le tasi o le faitoto'a o le va'a (**Kene. 6:16**); o Keriso o le Faitoto'a.

i. O Keriso le Faitoto'a e Tasi (**Gal. 4:12**).

ii. O Keriso le Faitoto'a avanoa e tasi i le lagi (**Ioa. 14:6**).

iii. O Keriso o le Faitotoa lea e ui tonu atu ai (**Ioa. 10:9**).

d. E ulufale i le va'a i le vala'aulia (**Kene. 7:1,7**); e talia Keriso i le vala'aulia.

i. E faigofie lava le vala'au a Keriso (**Ioa. 7:37**).

ii. E mautinoa le vala'aulia a Keriso (**Ioa. 6:37**).

iii. E malie le loto i le vala'aulia a Keriso (**Mata. 11:28-30**).

e. Lavea'i mai e le va'a mai le oti (**Kene. 7:21-23**); e lavea'i mai e Keriso tatou mai le oti.

i. Maliu Keriso ina ia maua le pule i kī o seoli ma le oti (**Fa'aal. 1:18**).

ii. Maliu Keriso e lavea'i iā i tatou mai le oti (**Ioa. 11:25, 26**).

- iii. Maliu Keriso ina ia ‘aveina atu i tatou i le Atua (**I Pete. 3:18**).
 - f. E saogalemū i le va’a (**Kene. 7:16**); e saogalemū iā Keriso.
 - i. E aumai e Keriso le saogalemu mai le toasa o le Atua (**Roma 5:9**).
 - ii. E aumai e Keriso le saogalemu mai le faafanoga (**Ioa. 3:18**).
 - iii. E aumai e Keriso le saogalemū mo le nofoāga e fa’avavau (**II Kori. 5:1**).
- 4. Olega ma le Fa’ai’uga.

Tatou filifili nei e talia le vala’au alofa a Iesu, ina ia tatou sosola atu iā te Ia, a o le’i o’o mai le taimi o le to’asā o le Atua. Ia tu’u atu lou loto atoa iā te Ia, ma mautinoa ai lo tatou saogalemū iā te Ia.

-57-

BIOGRAPHICAL SERMON “Lauga Paiokalafi”

I. O se fa'amatalaga o lenei lauga.

O le lauga lenei na te fa'amatala le tala i se olaga o se tagata, e maua ai o se a'oa'oga aogā. E matuā manino lava ona malamalama lelei e tusa i lau su'esu'ega itu ese'ese uma lava e fa'asino i lea tagata e te aumai ai o lenei matā'upu.

II. Fa'aa'oa'oga o le **Biographical sermon** (“Lauga paiokalafi”).

1. Autu o le lauga.

"O le tagata o nu'u 'ese na fa'amamāina lona lepela e ala i le usita'i."

2. Tusi faitau:

II Tupu 5:1-16 O le tala iā Na'amanu le ta'ita'i 'au.

3. Matua ma le manatu o le matā'upu.

"Ua ou iloa nei e leai se atua i le lalolagi uma, ua na o Isara'elu lava" (**II Tupu 5:15**).

4. Su'esu'ega ma a'oa'oga mai le tino o le lauga.

a. Manatu I. O lona tulaga (**F. 1**): "O le tagata aogā lava ma le tāua."

i. O le ali'i e pule i 'au a le tupu (**Gal. 10:1**).

ii. O se tagata e ta'uleleia (**Isa. 64:6**).

b. Manatu II. O lona gasegase (**F.1**): "E ma'i lepela o ia."

i. E iā te ia lenei ma'i na amata mai o la'itiiti (**Iako. 2:10**).

ii. E iā te ia le ma'i na lavea uma ai lona tino (**Isa. 1:6**).

c. Manatu III. O le avanoa sa ia maua (**F. 3**): "Pe 'ana i ai le perofeta. . . po ua fa'ate'aina lona lepela."

i. Sa fa'alogu o ia i le ta'utinoga a le teine itiiti (**I Nofo. 16:18**).

ii. Ua fa'alogu o ia i le mea e mafai ona fa'amaloloina ai. (**Roma 10:9, 10, 17**).

iii. Ua fa'alogu o ia i le ta'utinoga e maua ai e ia le fa'amoemoe (**Ioa. 10:25, 26**).

d. A'oa'oga IV.

O lona loto fa'amaualuga (**F. 11**): "Na ou fa'apea, e sau lava o ia i fafo iā te a'u."

i. Ua tupu lona ita ona o lona loto fa'amaualuga (**I Timo. 3:6**).

ii. Ua faitio o ia ona o lona manatu fa'amaualuga (**II Timo. 3:2**).

iii. Ua aumai e lona loto fa'amaualuga o se a'oa'iga (**II Timo. 3:2**).

- e. A'oa'oga V.
 0 lona usiusita'i (**F. 14**): "E tusa ma le 'upu a le tagata o le Atua.
 i. Ua fa'amauualalo o ia iā te ia (**Kene. 32:10**).
 ii. Ua lagona nei e ia le tāua o le fa'atuatua (**Mare. 9:23**).
 iii. Ua usita'i nei i le auauna a le Atua (Mata. 18:3).
 - f. A'oa'oga VI.
 0 lona fa'amalōlōina (**F. 14**): "Ona fo'i mai ai lea o lona tino tuai ua mamā o ia."
 i. Na fa'amamāina o ia i lea lava taimi (**Mare 1:42**).
 ii. Ua fa'amamāina ato'atoa o ia (**Kolo. 2:13**).
 iii. Ua faa'mamāina e aunoa ma se totogi (**Tito 3:5; Efe. 2:8,9**).
 - g. A'oa'oga VII.
 0 lana ta'utinoga (**F. 15**): "Ua ou iloa ... le Atua."
 i. 0 lana ta'utinoga e fa'atatau iā te ia lava (**Ioa. 9:25**).
 ii. 0 lana ta'utinoga e vi'ia ai le Atua (**Luka 8:39**).
 3. 0 lana ta'utinoga e fa'a'iloa atu ai le fa'afetai (**Luka 17:16**).
5. Olēga ma le Fa'ai'uga.
- E ta'ita'iina 'oe fa'apea fo'i ma a'u i le agalelei o le Atua a o feagai ai ma se faigatā o le olaga nei. E ui lava ina ou lagona lea alofa i se 'auala ua ui mai ai le fa'aaliga o lea alofa, a e tumau pea lava i lo'u loto le tete'e atu i le Atua, ona o uiga fa'ale tagata, uiga musuā, lē fia usiusita'i atu i le mea e fai ina ia maua ai le fa'amanuiāga mai le Atua. Peita'i, a liliu atu loa lo'u loto ma usita'i atu i se mea ua fa'a'iloa mai e le Atua ou te faia, ona fa'ataunu'uina loa lea o le la'asaga lea ou te mana'omia.

VAEGA III

O LE FAILAUGA A LE ATUA

O lenei vaega e fa'asino lea i le failauga ma lona vā feagai, e lē gata iā ia ma lona Atua a e fa'apea ōna uso a tagata o lo'o ia tala'i atu i ai le tala lelei o le Malō. E fa'amamafaina iinei le tāua o le sauni atu e fa'atatau i le leo, gagana, ma tāga e tatau ai ma le failauga a le Atua, a e maise e afāina ai i tū ma āganu'u a tagata o lo'o ia galue ai.

E lē gata i lea, talu ai le galuega tele o lo'o feagai ai ma le 'au faigaluega o le fesāga'i lea ma fesili 'ese'ese a i latou o lo'o fia malamalama i le Tusi Pa'ia, fia iloa atili po o le ā se taofi o le galuega a le Atua i matā'upu 'ese'ese o le fa'atuatuāga fa'a-Kerisiano, o lea fo'i ua saunia ai lenei matā'upu e fa'atatau i tali sa tali atu ai Iesu i ē sa fesili ane iā te Ia. Ia manatua fo'i lenei itū, sa i ai tagata 'ese'ese sa latou tu'u ane o ni fesili fa'atofotofo iā te Ia. Ma o nisi o i latou o ni tagata a'oa'oina lava, e i ai Faresaio, Satukaio, A'oa'o o le tulafono (Loia) ma tagata maualuluga lava, o faipule, atoa fo'i ma tagata fa'amaoni lava.

E tatau lava la i le failauga o le upu moni a le Atua ona ia su'esu'e lelei ma le fa'autauta, ona saunia lelei lea o ia e tu'uina atu o se tali e feagai tonu ma le fesili.

E aofia i lenei vaega le sauniga o le falelauasiga. Talu ai o na o le mana'omia tele ina ia ta'ita'iina o lea sauniga e le 'au faigaluega, toea'ina, ma ē ua tatau ai, o lea ua fa'aliliuina ai lea lava sauniga mai le tusi o le *“Manual for Ministers,”* ina ia mulimuli ai i lea lava fa'asologa ua tu'uina atu i lenei tusi. Ua fa'aalia mai, *“Ia faia ma le saunia lelei mea uma lava, ina ia vi'ia ai lo tatou Ali'i Fa'aola.”*

O NISI FA'ATONUGA MO LE FAILAUGA

- I. E uiga i le tū ma le va'aiga tino mai o le failauga.
1. O Teuga a le Failauga i le pulela'a ma so'o se sauniga lava.
 - a. Ofu lelei e tusa i lou tulaga i le silasila a tagata o lo'o i le sauniga. O le tū a le atunu'u o Samoa, o le fa'aaogāina lea o le peleue, o se faiga mamalu lava lea. Ia mamā lavalava, fusiua lelei, ma ia i ai sou solosolo.
 - b. I le sosaiete a tagata Samoa, ua latou fa'asāina lava le lauulu u'umi (Tamā po o taule'ale'a), ma foliga fa'apenā, o lea fo'i ua lelei ai ona tatou mulimuli ai i lea tū lelei a lo tatou atunu'u.
 - c. 'Aua ne'i e la'ei e tosina tagata iā te 'oe. Ia teuteu lelei ia tosina tagata i le Ali'i. O le fa'aaogāina fo'i o ni peni se tele i le taga, ia fa'aeteete ai lava.
 2. Leo, gagana, ma tāga a le failauga.
 - a. Ia leo tele ina ia lagona e le fa'apotopotoga uma o lo'o i le sauniga. Taumamāo ma le leo 'ava'avau, fia leo 'ese, a e lelei ona fa'aaogāina lou lava leo. 'Aua fo'i le fa'atelevaveina lau tautala, ne'i lē manino āu 'upu e lafo atu, e i'u ai ina maumau lau sauniuniga.
 - b. I le Gagana, ia e manatua 'upu ia e te lafo atu, e ui atu ai le fe'au mai le Atua e te fa'afeso'otai atu i ē o lo'o fa'alologologo. Ia fa'aaogāina le gagana faigofie, gagana e fa'aaogāina e tagata lautele i aso fai so'o atoa ma 'upu logoleleia. Taumamāo ma le fa'aaogāina o fuaitau mamāo ma le loloto, ina ne'i lē malamalama le fanau o lo'o i le sauniga. Tatala lou fofoga, ma ia 'avea 'upu e te lafo atu, ia pei o le tafe malie atu o le suāvai e feinū ai ma fa'amalieina ai lē matelāina o le 'au fa'afofoga.

Ia manatua nei soāfuai 'upu: "a'e i mauga; ifo i vanu;" "alu a'e le lā;" "goto ifo le lā." (E sesē pe a fa'apea, ua ōso ifo le lā, pe alu ifo i luga le tama i le la'au).
 - c. O āu Taga.

Ia fetaui 'upu e lafo atu ma taga e fai e ou lima. O le fai fa'atatau lelei e mana'omia tele i lea itū. Pei o lenei, o se fa'aa'oa'oga: Ua fa'amamafaina i lea vaega o lau lauga le aso e afio mai ai Iesu i ao o le lagi. E lelei ona tepa a'e i luga lou ūlu, ma sisi'i uma ma ou lima e lua, ma fa'atepa atu i luga ao o le fa'apotopotoga, ona o lea matā'upu ua e fa'amamafaina e mana'omia ai o se faiga fa'apenā. Ia fai tāga ia mamalu ai le tautalaga o lo'o feagai ai ma 'oe i luma o ali'i ma tama'ita'i o lo'o latou fia maua le olataga.

II. E uiga i le sauniuniga a le failauga mo le sauniga.

1. Tusi si'i e faitau mai e se tasi o le fa'apotopotoga.

O se faiga lava lea e lelei pe afai e te muā'i tofia se tasi po o nisi latou te faitauina ni tusi si'i o lau lauga. Ta'u i ai le molimau e te mana'omia, ma o lea uso e faitauina le tusi si'i, o se tagata e leo tele, faitau manino ma le malamalama. Ia nofo fo'i i tua, ina ia lagona uma e le fa'apotopotoga. O le saunia lelei, e aofia i ai lea itu.

2. Le Fata pa'ia a le Atua mo le failauga.

O le pulela'a atoa lava i lona lautele ma lona umi, o le malae lenā e fa'atagaina le failauga na te fa'aaogāina. E mafai ai e ia ona savali ma tepa atu i itu uma lava o lo'o i ai le fa'apotopotoga o lo'o aofia ai i lana lauga.

O ĀLA E TALI ATU AI I FESILI

I. Fa'amatalaga i lenei matā'upu tāua.

O le atamai i le saunia o fesili o se mea tāua lea, a o le iloa lelei ona tali atu i fesili, e leai se mea e fa'atauva'a ai i lo le isi. E tele molimau ese'ese mai le Tusi Pa'ia ua tatau ona a'oa'oina lelei ai le vasega o failauga mo lea lava itū. Ua fa'apea mai le Poto, "O le tali atu i le vale e tusa ma lona valea e ui fo'i i lea;" a ua fa'atonu mai fo'i, "Ia tali atu i le vale e tusa ma lona valea e ui fo'i i lea;" a ua fa'atonu mai fo'i, "Ia 'aue ne'i tali atu i le vale e tusa ma lona valea."

Ona o ia la'asaga e feagai ai, ua mana'omia ai le su'esu'ega lautele ma le poto e tusa i tali e tatau ona faia i ē fesili mai iā te i tatou. O le sini lenei, "E su'esu'e le lotu o le poto ina ia fai o se tali e feagai ai ma le fesili e malie ai" (**Fa'ata. 15:18**). O le su'esu'e atu i le ta'ita'iga a le Agaga Pa'ia ina ia maua le āla sa'o, ua mana'omia ai le matuā su'esu'e i āla sa uia e Iesu mo lea itū o Lana galuega i lenei lalolagi.

II. Su'esu'ega i tali ma o latou ese'esega.

1. E afifi e Iesu o Āna tali i isi taimi i totonu o fa'ata'oto.

- a. *Fesili* a Peteru: "Ua matou tu'ua mea uma, a e mulimuli atu iā te 'oe, o le ā se mea matou te maua?" (**Mata. 19:27; 20:1-16**).

Tali: O le matai na sa'ili se 'au faigaluega i itūaso ese'ese atoa ma le todogi e maua e i latou.

- b. *Fesili* a le a'oa'o tulafono poto: "O ai lē ma te tuā'oi?" (**Luka 10:25-37**).

Tali: O le tala i le tagata Samaria agalelei.

- c. *Fesili*: Pe tatau 'ea ona fa'amalōlō o se ma'i i le sapati? (**Mata. 12:11, 12**).

Tali: O le tala i le mea e tatau ona faia i le manu pe a pa'ū i le lua i le aso sapati. O mea e tutupu, o va'aiga e fa'amatalaina i 'upu, e sili mamao atu ia i finauga. O i latou e pupula, e fa'aliliuina le 'upu moni i le ola, latou te tu'uina atu o a'ano ma toto i le ola. E leai se finauga e tupu mai ai. E lē tupu ai se taua i 'upu. E ui atu lava i le ala ua avanoa mai, ma e lē te'ena fo'i. E tele fesili e tali atu i tala, a ia fa'aeteete ne'i 'avea ma ala e maua ai le avanoa e toe ui mai ai nisi fesili.

2. E fa'atino atu e Iesu le tali i le a'ano, a e lē o mata'itusi. O le mata'itusi e lē o i ai se mea, a o le a'ano e tāua lea pe a maua le uiga tonu o le fesili

- a. *Fesili* a le a'oa'o tulafono, "Le a'oa'o e, o le fea poloā'iga e muamua ma sili?" (**Mata. 22:35 – 40**).
Tali: "Ia e alofa atu i le Atua ... Ia e alofa i lē lua te tuā'oi." E leai se poloā'iga e muamua pe tū lua. O le alofa o le a'ano lea.
- b. *Fesili* a Peteru: "E fa'afia 'ea ona āgaleaga mai lo'u uso iā te a'u ma 'ou fa'amagalo atu i ai? E fa'a fitu 'ea?" (**Mata. 18:21-35**). O le fuainumera ua ui mai ai le fesili.
Tali Iesu i le tuā'oi e lē gata mai ai le fuainumera na tu'uina atu, i le taumafai atu o le tagata ola. *O le fa'amagalo moni, e lē faitauina i se fuainumera.*
3. Fa'asino atu lē ua fesili i le Tusi Pa'ia.
 - a. *Fesiligia* po o ia ua fa'au'uina i le galuega?
Tali: "E su'esu'e outou i Tusi, auā o Tusi ia o lo'o molimau iā te a'u" (**Ioa. 5:39**).
 - b. *Fesili* fa'afiapoto a le 'au Satukaio: "O ai o lenei to'afitu e fai ma ia le āvā i le aso o le toe tutu?" (**Luka 20:27-36**).
Tali: Tou te le'i faitaulia ea le mea ua fai mai ai le Tusi, "latou te lē fai āvā pe nofo tane... a e latou te pei o agelu."
 - c. "O le ā se mea lelei ou te faia ou te maua ai le ola e fa'avavau?" (**Luka 10:25-28**).
Tali: "O le ā ea ua tusia i le tulafono?"
 - d. *Fesili* le 'au Faresaio, "Pe ai se ā ua latou o'oti ai 'au o saito i le aso sapatu?" (**Mare. 2:23-28**).
Tali: Tou te le'i faitau ea i le mea na fai e Tavita? E mana'omia tele le fa'autauta ma le iloa lelei o le vaega o le Tusi Pa'ia e fa'asino i ai le tali ina ne'i ta'ufa'atauva'aina Afioga tusia a le Atua.
4. E va'ai atu o ia i le uiga o lē e fesili, a e lē o mata'itusi o le fesili. Ia mua'i malamalama i le agaga o lo'o i lē ua fesili, ona fai fa'atatau lea o le tali i ai, ia muamua i lea, a e mulimuli i mata'itusi o le fesili.
 - a. *Fesili*: "O ai e sili i le malo o le lagi?" (**Mata. 18:1-4**).
Tali: Ua aumaia e Ia le tamaitiiti ma fa'atū i o latou luma.
 - b. *Fesili*: "E o'o afea ia mea ... o ā fo'i fa'ailoga o Lou maliu mai ma le gata'aga o le lalolagi?" (**Mata. 24:3-14, 44**).
Tali: E moni lava sa ta'u atu e Iesu uiga o mea e tutupu mai, amioga a tagata, uiga o aso, ona fa'apea atu ai lea o Ia, ia outou sauni, o le mea tataua lea ma le uiga o le tali atu i le fesili.
5. E tali atu i le fesili atu e fa'atatau i le fesili ua tu'uina mai. A e maise lava pe a o'o atu le fesili i le laina o le lu'i mai po o le fia a'oa'i mai.
 - a. *Fa'afesili* iā Iesu: Se ā le mea ua soli ai e Ōu so'o le 'uputu'u mai anamua? (**Mata. 15:1-3**).

- Tali*: O le ā le mea ua outou solia ai poloā'iga a le Atua i outou 'uputu'u?
- b. *Fesili*: Pe sã ona avatu taulaga iā Kaisara? (**Mar. 12:14-17**).
Tali: Pe ai se ā ua outou tofotofo mai ai iā te A'u o outou tagata pepelo? Ona tago lea o Ia i le tupe ua va'ai i ai ma toe fesili atu, "E ō ai lenei fa'atusa? Sa vave oso mai la latou tali, E ō Kaisara." E le'i umi a e maua loa ma le tali o la latou ulua'i fesili, ina ua fa'apea atu Iesu, "Ave mea a Kaisara iā Kaisara, a e 'ave fo'i mea a le Atua i le Atua." Sa latou taumafai e fa'alavelave le manatu o Keriso, peita'i, ua sili ai ona lavelavea i latou i lenei feto'aiga.
6. Ia aunoa ma se 'upu e tali atu ai. Manatu iā Iesu i luma o Pilato (**Mata. 27:31, 14**). E i ai isi fesili ia tali atu i le "leai o se 'upu e lafo atu," auā o le lafo atu o se 'upu e tupu ai le to'ilalo.
7. O le *fesili* o fesili.
 "Se a le mea e tatau ona ou faia ou te ola ai?" (**Gal. 16:30**). E fa'atatau le tali i le la'asaga o lo'o feagai ai ma lē ua fesili. O le mana'oga fa'amaoni e ta'ita'iina atu ai lē ua fesili ina ia na faia le mea e mana'omia e le tala lelei.
Tali ese'ese mai le **Luka 3:10-14**:
- a. Mo ē manumanu, "Ia avane iā te ia e leai sona ofu, fafaga i le tagata fia 'ai."
- b. Mo fitafita sauā, "'aia tou te fa'asauā i se tasi...."
- c. E mana'omia tele le tali mai le Agaga Pa'ia mo lenei fesili, auā o le fa'a'upuga e faia e le failauga, o le a fai ai le filifiliga a le tagata mo le Ali'i.

SAUNIGA O LE FALELAUASIGA

I. O se fa'amalamalamaga.

O le maliu po o le oti, o se ali'i asiasi mai lea e le'i fa'amoemoeina e o tatou aiga. Ma e leai se vaega o le galuega a le faife'au e mana'omia tele ai lona agava'a fa'autauta e pei o lona 'au ai atu lea i le aiga o lo'o i ai le fa'anoanoāga. Ia fa'amafanafana atu i lea aiga, ma latou fai tonu e fa'atatau i le sauniga o le falelauasiga. O le ituaso lava e maua ai e le faife'au se fa'aaliga o le maliu o se uso, ia alu atu loa lava i ai ma fa'amafanafana, ma ofo ina atu lana galuega iā i latou. E tatau ona feutaga'i lelei ma le aiga e fa'atatau i o latou mana'oga e tusa ma le sauniga atoa lava.

Atonu e i ai i le aiga se fa'anaunauga ina ia ta'ita'iina lea sauniga e se faife'au, o lē sa 'avea ma uō mamae a lea aiga. Ia fetu'utu'una'i lelei e ia ali'i faife'au lea sauniga. Afai fo'i e fa'aalia e le aiga se pese fa'apitoa, fa'apea ma i latou o ē tau a'aoina le pusa maliu, atoa fo'i ma isi faife'au e fesoasoani i le sauniga, o le a fa'apea lava ona fetu'utu'una'i ma le faife'au itu uma.

Ia mautū le taimi ma le nofoāga e fai ai le sauniga, o nisi atunu'u e lelei ona faia o lea sauniga i le malumalu, a o nisi fo'i e sili atu pe a faia lava i totonu o le fale o le aiga. Afai o le malumalu e fai ai le sauniga, ia logoina le 'au ofisa, po o le ta'ita'i mo le fa'atagaga atoa ma le teuteuina o le malumalu. Ia manatua fo'i lenei itū, e i ai lava lē e pulea le fa'agaoioiga a le itū o le aiga, o ia lenā e ao ona feso'ota'i ma le faife'au.

O le faife'au lava o ia lea e pulea le sauniga uma i le itu fa'aleagaga. 'Aua fo'i ne'i galo ona ia faia se tala o le soifuāga o lea uso ua maliu. E mafai ona tu'u 'ese lea itū i le maliu o se tamaitiiti. E ao fo'i ona manatua lenei itū, o lea sauniga e lē o se sauniga e fai ai se lauga umi; e lē gata i lea, e lē o se sauniga fo'i e fa'amatala ai ni matā'upu o se fa'atuatuāga o se ekalesia, a o le sauniga lava e fa'atepa atu ai loto o le aiga fa'anoanoa i le fa'amoemoega sili o le Kerisiano, i le toe tutū mai lea i le aso o le toe tutū mai i le afio mai o le Ali'i. O lauga fa'apea e mafai ona fa'amaise ina ai loto o le aiga.

II. E uiga i le Sauniga.

1. Pe a ua nofoia loa le sauniga: i le malumalu, po o le aiga (tu'ugamau fo'i)
2. Amata i se pese filifilia.
3. Tatalo.
4. Faitauga mai le Tusi Paia, filifili mai i Tusi nei:

Sala. 90:1-4, 10, 12; 103:13-16; Iopu 14:1, 2, 14, 15; Isaia 40:6-8; I Kori. 15:51-57; I Tesa. 4:13-17.

5. Tala i le soifuāga o lē ua maliu.
6. Lauga.
7. Tatalo.
8. Aga'i atu loa i le fanua maliu (Muamua le 'au faigaluega i le solo).
9. O le pule o le sauniga na te fa'atulagaina le pusa, ma nisi mea e aofia ai.
10. Pese.
11. A o i ai le pusa i luga o le tu'ugamau, faitau loa e le faife'au ta'ita'i o 'upu nei: "O a'u nei o le toe tū ma le ola; o lē e fa'atuatua mai iā te a'u, e ui lava ina oti, e ola lava ia.... 'Aua e te fefe, o a'u le Muamua ma le Mulimuli; o le ola nei lava, sa ou oti; fa'auta fo'i, ou te ola e fa'avavau fa'avavau lava, Amene, o ia te a'u fo'i ki o seoli ma le oti....
Na ou fa'alogo fo'i i le leo mai le lagi ua fa'apea mai ia te a'u, ia e tusi, 'Amu'ia ē ua oti, o ē ua oti o i le Ali'i e amata i nei ona po. O lea lava ua fetalai mai ai le Agaga, ina ua latou malolō i a latou galuega tigā, o a latou galuega fo'i e mulimuli iā te i latou.' Na ou fa'alogo fo'i i le leo tele mai le lagi, ua fa'apea mai, 'Fa'auta, ua fa'atasi ma tagata le fale fetāfa'i o le Atua, e mau fo'i o ia ma i latou, e fai fo'i i latou mona nu'u; e iā te i latou le Atua lava, o lo latou Atua o ia....
E soloi'esea fo'i e le Atua loimata uma i o latou mata, e leai fo'i se toe oti, po o se fa'anoanoa, po o se auē, e leai fo'i se toe puapuagā; auā ua mavae atu mea muamua." (E mafai lava e le faife'au ona fa'aopoopo i ai i lana faitauga le **I Tesa. 4:13-16**).
12. Tu'u i lalo le pusa i le tu'ugamau.
13. Tago lea o le faife'au i sina ele'ele ma fa'apea atu: "I le silafaga poto o le Atua ma Lona alofa silisili 'ese, ina ua fa'atagaina lo tatou uso . . . e moe iā Keriso, o lea fo'i tatou te tu'uina atu ai nei lona tino i le ele'ele, o le palapala i le palapala, o le lefulefu i le lefulefu (lulu atu ele'ele i le pusa), o le efuefu i le efuefu, i le fa'amoemoe mautinoa lava i le toe tutu fiafia mai i le ola e fa'avavau e ala iā Iesu Keriso lo tatou Ali'i, o Lē na te liua o tatou tino ia foliga i Lona tino matagofie i le aso o Lona afio mai; tatou te tu'uina atu ai nei iā te Ia mea uma lava e tusa ma le pule uma ua iā te Ia."
14. Tatalo fa'ai'u.
(E lē o se tulafono, peita'i, i nisi lava sauniga e fia usuina nisi pese se lua pe tolu fo'i, ona fa'ato'ā tu'ua lea o le sauniga).